

# TAUSIGA MO I LATOU E MANAOMIA LE FESOASOANI

LIPOTI FAALETAUSAGA 2022

*o Le Ekalesia a Iesu Keriso o le Au Paia o Aso e Gata Ai*





---

## Anotusi

- 3 O Se Savali mai le Au Peresitene Sili
- 4 Aotelega o Taumafaiga

### TAUSIGA MO I LATOU E MANAOMIA LE FESOASOANI

- 8 O La Tatou Tautinoga e Foai Atu
- 10 Faifeautalai o Ioo Auauna Atu i Tagata o le Ekalesia ma le Nu'u
- 12 Ofoina atu o le Malutaga
- 14 Faatinoga a Tamaiti ma le Autalavou

### JUSTSERVE [NA O LE AUAUNA ATU LAVA]

- 16 JustServe [Na o le Auauna Atu Lava] i le Mea O E I Ai
- 18 Galulue Faatasi i Ekalesia Soofaatasi

### FESOASOANI I LE LALOLAGI ATOA

- 20 Galuega Faama'ite i le Lalolagi Atoa
- 22 Aferika ma Sasae Tutotonu
- 24 Asia, Ausetalia, ma Atumotu o le Pasefika

- 26 Europa
- 28 Amerika i Matu
- 30 Amerika i Saute, Amerika Tutotonu, ma le Atu Karipeane

### ATIINA A'E O LE OLA TUTOATASI

- 34 Tausimea Faalesiosiomaga
- 35 Polokalama o Aoga
- 36 Gaosiga ma le Faasoasoina o Taumafa
- 38 Tautua mo Aiga
- 39 Kosi mo le Ola Tutoatasi
- 40 Auaunaga mo Galuega ma Faleoloa o le Tesareta
- 42. Soloaiga o Auaunaga

### O LE A SE MEA E MAFAI ONA OU FAIA?

- 44 Auauna atu i Lou Nu'u
- 46 Punaoa e Aoao Atili Ai

### PUNAOA FAASINO

*Ata o le Faavaa—ShelterBox: O Susana o loo nofo i lona fale i Vanuatu ma meafaigaluega i ona lima ua saunia e auauna atu i lona nuu ina ua mavae se afa na taia ai o latou fale.*



Luga a'e: O Peresitene Russell M. Nelson ma ona fesoasoani e toalua, o Dallin H. Oaks ma Henry B. Eyring.

## UO PELĒ,

*O Iesu Keriso o le faataitaiga lelei atoatoa o le tausia o i latou e manaomia le fesoasoani. I le avea ai ma Ona soo, tatou te saili e alolofa i le Atua ma o tatou tuaoi i le lalolagi atoa. E naunau Le Ekalesia a Iesu Keriso o le Au Paia o Aso e Gata Ai e faamanuia isi ma fesoasoani ia i latou e manaomia le fesoasoani. Ua faamanuiaina i tatou i le i ai o le tomāi, punaoa, ma sootaga faatuatuaina i le lalolagi atoa e faataunuu ai lenēi tiutetauave paia, lea tatou te mafaufau i ai o se avanoa fiafia.*

*A tatou alolofa i le Atua ma o tatou loto atoa, Na te liliu atu o tatou loto i le soifua-manuia o isi i se taamilosaga matagofie, ma mamā. Ua tumu lo tatou lalolagi i lu'itau o feteenaiga, fiaaai, faama'i, faalavelave, mativa, faama'i oti, ma avanoa i manaoga autu faaletagata. Po o le a lava le mea e oo mai, ua i ai lo matou faatuatuaga ma le talitonuga i le agalelei o tagata.*

*Matou te fiafia lava e tuuina atu lenēi lipoti faaletausaga o la tatou galuega e tausia ai fanau a le Atua. Matou te faailoa atu ma le agaga faafetai le auaunaga lē manatu faapito ma le foai atu o taimi, tupe, ma isi punaoa e tagata o le Ekalesia ma uo a o tatou tausia faatasi isi.*

*A o faaaauu pea ona tatou alolofa ma fefaamalosia'i le tasi ma le isi e ala i le auauna atu, matou te valaaulia tagata uma ina ia auai faatasi ma i tatou i lenēi galuega taua.*

**O Le Au Peresitene Sili** *Russell M. Nelson*  
*Dallin H. Oaks*  
*Henry B. Eyring*

## AOTELEGA O TAUMAFAGA

“O poloaiga sili e lua e mafai ona taiala ai i tatou: muamua, ia alofa i le Atua ma le, lona lua, ia alolofa i o tatou tuaoi. Tatou te faaali atu lo tatou alolofa e ala i le auauna atu.”

—PERESITENE RUSSELL M. NELSON, PERESITENE O LE EKALEZIA A IESU KERISO O LE AU PAIA O ASO E GATA AI<sup>1</sup>

**3,692**

GALUEGA FESOASOANI  
ALOFA I LE 2022

**\$1.02 piliona**

I TUPE FAAALU

**6,300,000**

ITULA NA OFOFUA ATU

**190**

ATUNUU MA TERITORI  
NA AUAUNA ATU I AI





# \$1.02 piliona

*sa faaaogaina e fesoasoani ai ia i latou e manaomia le fesoasoani:*

## O Auaunaga Na Muai Ofoina Atu i Tagata o le Ekalesia

- **FESOASOANI O LE TAULAGA ANAPOGI**, lea e tuuina atu ai fesoasoaniga le tumau tautupe ia i latou e manaomia le fesoasoani.
- **O OKA A EPIKOPO MO OLOA**, e aofia ai le tuuina atu o meaai ma oloa mai faleoloa a epikopo ma Faleoloa o le Tesareta ia i latou e manaomia le fesoasoani.
- **O FAAGAOIOIGA A LE EKALLESIA**, e aofia ai fautuaga o Tautua mo Aiga, nofoaga autu mo galuega, faatoaga ma fale gaosi taumafa, ma Faleoloa o le Tesareta.

## Auaunaga e Ofoina Atu i Tagata Lautele

- **GALUEGA FESOASOANI ALOFA**, e aofia ai le toomaga agaalofa i nuu i le salafa o le lalolagi.
- **O OLOA NA FOAI ATU**, e aofia ai oloa na gaosia e le Ekalesia e tuuina atu i nuu e ala i faalapotopotoga e foai atu ai meaai ma isi ofisa.
- **O LAVALAVA NA FOAI ATU**, e aofia ai ofu e pau le tau pe leai se tau e tuuina atu i Faleoloa o le Tesareta [Deseret Industries]



*Na tuuina atu e volenitia le sili atu ma le*

# 6.3 miliona itula

*o auaunaga e ala i le:*

- **AUAUNAGA I FALE MA FANUA O LE EKALLESIA**, e pei o faatoaga, togalaau, fale tuuapa, Faleoloa o le Tesareta, ma isi.
- **MISIONA E TAUSIA AI I LATOU E MANAOMIA LE FESOASOANI**, e aofia ai auaunaga e ofo fua atu i le tele o atunuu i le salafa o le lalolagi.
- **O GALUEGA FAATINO FAALEAUAUNAGA E LAGOLAGOINA E LE EKALLESIA**, e aofia ai le faamamaina pe a mae'a mala faalenatura.

*E le gata i lea, sa faafoeina e le JustServe le silia ma le 130,511 o galuega faatino volenitia (e aofia ai le 16,285 o galuega faatino fou).*

## TAUSIGA MO I LATOU E MANAOMIA LE FESOASOANI

*Auaunaga e ala i Tagata o le Ekalesia ma Faifeautalai***174**

Galuega faatino o le tali atu i tagata sulufai

**11,030**

Tagata faamisiona o le Uelefea ma le ola tutoatasi



## JUSTSERVE

*Tulaga o Auaunaga i Nu'u***69,115**

O tagata fou ua lesitala e faaogaina le JustServe

**16,285**

O galuega faatino fou ua fatuina a le JustServe



## FESOASOANIGA I LE LALOLAGI ATOA

*Galuega Faama'ite mo Fesoasoani Alofa i le Lalolagi Atoa***520**

Galuega faatino o le saogalemu o meaai

**54**

Galuega faatino feavea'i

**156**

Galuega faatino o le suavai mama

**42**

Galuega faatino o le tausiga o mata

**45**

Galuega faatino o le tausiga o tina failelele

**483**

Galuega faatino e tali atu ai i faalavelave faafuasei

## FAUSIAINA O LE OLA TUTOATASI

*O Polokalama ma Auaunaga***439**

Galuega faatino mo aoaoga

**106,261**

Tagata auai o le kosi o le ola tutoatasi

**525**

Fonotaga i vaiaso taitasi o le toe faaleleia mai mea ua fai ma vaisu

**9,186**

Paaga a le Faleoloa o le Tesareta na tautuaina

# Tausiga mo i Latou e Manaomia le Fesoasoani

“I le salafa o le lalolagi, e maua ai e tagata o Le Ekalesia a Iesu Keriso o le Au Paia o Aso e Gata Ai le olioli i le tuuina atu o o tatou taimi, taleni, ma punaoa e fesoasoani ai ia i latou e le tagolima—aemaise lava pe a le faigofie pe toafimalie le faia o lena mea. Tatou te faafetai mo avanoa e avea ai ma soo sili atu o Iesu Keriso a o tatou ola ai i le lona lua o Ana poloaiga sili.”

—SISTER J. ANETTE DENNIS, FESOASOANI MUAMUA I LE AU PERESITENE AOA O LE AUALOFA





*O tagata o le Ekalesia a Iesu Keriso o le Au Paia o Aso e Gata Ai e talitonu i le mulimuli i poloaiga sili e lua a le Faaola: ia alolofa i le Atua ma ia alolofa i o tatou tuaoi.*

*O le auauna atu o lona uiga o le aoao ia iloa ma taulima manaoga o se tasi. E faaopoopo atu i le auauna atu i tagata i a tatou aulotu i le lotoifale, tatou te saili atu ma le agaga tatalo i avanoa e auauna atu ai ia i latou i fafo atu o lo tatou faatuatuaga e ala i auaunaga faalenuu ma isi galuega faatino.*

*Tatou te taumafai e mulimuli i le faataitaiga a Iesu Keriso i le tausiga o i latou e manaomia le fesoasoani—e tusa lava po o a nofoaga, ituaiga, tagatanuu, itupa, talitonuga faalelotu, po o fesootaiga faapolokiki—e aunoa ma se faamoemoe i ni mea e toe maua mai ai.*

## O La Tatou Tautinoga e Foai Atu

### Auaunaga i Totonu O Le Ekalesia

O se vaega o la tatou feagaiga ia alolofa i le Atua ma alolofa i o tatou tuaoi, e anapopogi tagata o le Ekalesia mo le aso e tasi i masina taitasi ma foai atu ma le lima foai le tau o taumafataga na misi ina ia manuia ai isi tagata o le ekalesia e manaomia le fesoasoani.

E le gata i lea, e ofo atu e tagata o le Ekalesia o latou taimi, taleni, agaalofo, anomea, ma punaoa tautupe. O nei saofaga o se vaega o le “faleteuoloo a le Alii” o punaoa e fesoasoani ai i Ana fanau.

I le avea ai ma tagata O Le Ekalesia a Iesu Keriso o le Au Paia o Aso e Gata Ai, o le faaalio o le alofa i isi e ala i le fefaasoaai o punaoa ma le tuuina atu o auaunaga, o se vaega taua o o tatou talitonuga—ma talu mai lava aso popofou o le Ekalesia.

O le Aualofa o se faalapotopotoga a tamaitai ua tuuina atu i ai le tausiga o tagata taitoatasi ma aiga e feagai ma manaoga. Na faavaeina i le 1842, na taialaina e le faalapotopotoga ia augatupulaga o tagata o le Ekalesia a o latou galulue e auauna atu i soo se tasi e manaomia le fesoasoani. I le 2022, o lenei tuuto i le alofa mama sa faamamaluina e ala i se aso o galuega auauna atu na faamaeaina i le salafa o le lalolagi, ma faamanatuina ai le 180 tausaga o le Aualofa.

Mo tagata o le Ekalesia, o lenei auaunaga o se mea masani ma e faia e aunoa ma se faamoemoe e aloaiaina po o se tau. O Kym, o se tagata o le Ekalesia i Siamani, na aoteleina le naunautaiga o tagata o le ekalesia e auauna atu, ma faapea mai, “O le faleteuoloo a le Alii, o tagata o e tuuto atu ma le loto i ai o latou taimi, taleni, tomai, po o anomea e fesoasoani ai i isi ... e tusa lava po o le a le ituaiga, tapuaiga, po o tulaga. E faalotomauualoina le avea ma se vaega o le faleteuoloo a le Alii.”<sup>2</sup>







Luga a'e: O aulotu i le eria na potopoto ma foai atu ni aitema e manaomia e fesoasoani ai i tagata o Toga.

*“O le galuega alofa a le Ekalesia o se meaalofa na’ua. O le fua o taulaga tuufaatasi, faapaiaina a le Au Paia, o se faailoaga o lo tatou alolofa i le Atua ma Ana fanau.”*

—EPIKOPO L. TODD BUDGE,  
FESOASOANI LUA I LE AU EPIKOPO  
PULEFAAMALUMALU<sup>3</sup>

### **Auaunaga i Tagata Uma**

I le tausaga ua te’a, sa faatulagaina ma aoina ai e aulotu a le Ekalesia i Kolomupia ni foai mo le Casa Hermana Helena Foundation. O nei foai na mafai ai e teineiti talavou o e na tuulafoaiina, ona lagona le saogalemu ma le alofaina a o latou faamasani i o latou olaga fou.

I le Eria o le Pasefika, na o mai faatasi ai le Au Paia o Aso e Gata Ai e lagolago o latou tuaoi ina ua uma ona aafia Toga i se mafuie, se maugamu lata ane na pa, ma se galulolo. Sa galulue faatasi aulotu i le eria atoa ma o latou nuu e foai atu ma ao mai meaai, lavalava, vai, oloa mo le tumama, ma masini e fesoasoani ai i tagata i Toga. O lenei mea na aofia ai le 300 tone o sapalai mai Tahiti lava ia.

Ina ua pagatia i se afā kiona matuia le toatele o tagata matutua ma tamaiti i Idaho i le Iunaite Setete, sa tatalaina e le aulotu a le Ekalesia i le lotoifale lo latou falelotu. Faatasi ai ma lo latou nuu, sa latou tuuina atu ni meaai vevela i tagata malaga ma aoina foai o meataalo, susu mo pepe, ma isi mea e tataui ai, e fesoasoani ai seia mavae le afā ma toe tatala auala.

I le 2022, o foai o le toto o tagata o le Ekalesia i le Koluse Mumu a Amerika e sili atu ma le tasi le miliona iunite, na oo atu ai i le tusa ma le tolu miliona o tagata. E faapena foi tuiga toto na faatulagaina e aulotu i eria uma o le lalolagi.



*E ui o le toatele o tagata o le Ekalesia e auauna atu i totonu o o latou nuu i le lotoifale, ae o nisi ua filifili e tuuto atili atu o latou taimi i galuega alofa. O le toatele o alii ma tamaitai talavou nofofua e faataunuaina se matafaioi faafaifeautalai auauna atu mo na o sina taimi, lea latou te faatulagaina ai ma auai i auaunaga ma galuega fesoasoani alofa i totonu o o latou nuu.*

*O ulugalii faaipoipo e mafai ona filifili e auauna atu o ni faifeautalai faamisiona o le uelefea ma le ola tutoatasi. E tuuto atu e nei ulugalii o latou taimi e faatautaia ai galuega faatino o fesoasoaniga alofa i la latou eria ua tofia i ai.*

*O faifeautalai faamisiona e auai i galuega auauna atu o se vaega o la latou auaunaga—e ese mai a latou galuega o le aoao atu e uiga i le Faaola. E fesoasoani nei faifeautalai i faama'ite e tali atu ai i faalavelave faafuasei pe a tula'i mai.*

## Faifeautalai o loo Auauna Atu i Tagata o le Ekalesia ma le Nu

### Faama'ite mo Auaunaga

E faitau selau faifeautalai i le salafa o le lalolagi ua tuuto atu ni nai masina o o latou olaga e fesoasoani ai e faatino le galuega o le tausiga o i latou e manaomia le fesoasoani.

O nisi, e pei o le 'au Thomas, e galulue i faagaoioiga e pei o le Tautua mo Galuega lea e fesoasoani ai i tagata o le Ekalesia e fausia le ola tutoatasi. Latou te saunia aoaoga mo le faia o faatalanoaga, fesoasoani i le tusiaina o talaaga pupuu o aoaoga ma agavaa, ma avanoa mo upegafesootai ia i latou o loo saili mo se galuega. O isi e auauna atu i le alalafaga i se tulaga lautele e ala i le faailoaina ma le faatautaia o galuega faatino o fesoasoaniga alofa i o latou eria ua tofia i ai. Mo se faataitaiga, o Elder Christensen, e faamaopoopoina le galulue faatasi o le Ekalesia ma le Colori Vivi, o se kamupani i Italia lea e tuuina atu ni galuega su'isu'i ma aoaoga faamasani mo tina o e ua faaunuua mai o latou fale.

### Toomaga i Faalavelave

E masani ona valaauina faifeautalai e ofo atu la latou fesoasoani i faalavelave faafuasei ma isi faalavelave. I Polani, sa fesoasoani ai le 'au Foote (o se ulugalii faamisiona i auaunaga alofa) e faamamā avega a isi ina ua la matauina e toatele tagata ua leai ni fale na taunuu i le nofoaga o nofoaafi, sa tautosoina ni uta o meatotino i ni taga faatau mamafa po o ni taga faafafa. Ina ia fesoasoani, na amata ona tufa atu e le 'au Foote ia atopa'u toso i soo se tasi na manaomiaina. I se tasi taimi, na oo i le 60 atopa'u na tuuina atu i se aso se tasi.



Luga a'e: O faifeautalai e toalua o loo auauna atu i tagata o Kana, Aferika i Sisifo.



Luga a'e: O faifeautali o loo fesoasoani e saunia meai i le taimi o se galuega fesoasoani i Hong Kong.

*“O le taimi lenei tatou te faamanuia atu ai i isi ma “sii i luga lima o tautau i lalo.”*

—PERESITENE RUSSELL M. NELSON<sup>5</sup>

E oo i le ono itula sa tietie atu ai faifeautalai mai Kanata i se taulaga laitiiti i Minesota i le Iunaite Setete e faamaopoopo taumafaiga mo toomaga ina ua mavae ni lologa se tele. I le aluga o se masina, sa galulue ai faifeautalai ma isi volentia mai le itulagi i le 12 e oo i le 14-itula mo le tele o aso, i le tuuina o taga oneone faataamilo i fale ma pisinisi i eria na aafia ai.

O nei faataitaiga o auaunaga ua na o ni nai mea laiti o le mau mea e faatinoina e faifeautalai i tausaga taitasi. O na faatinoga laiti e faaputuputu e faamāmā ai avega ma toefuatai ai le faamoemoe.

“O lenei galuega e faavaivai tagata, faaletino ma faalelagona,” o le tala lea a Sister Foote. “Ae e mafai ona e vaia le oo mai o le susulu i o latou mata ma se faamoemoe faafouina. E mafai ona tatou vaai ua tatou faamāmāina le avega a se isi tagata. E matuai aoga lava.”<sup>4</sup>

### **Auaunaga i le Alalafaga**

E fautuaina faifeautalai e faaalu le 4-40 itula i le vaiaso e tuuina atu ai auaunaga i nuu. Mo se faataitaiga, na ofo atu e faifeautalai i Ekuatoa o latou taimi ma taumafaiga e faamāmā otaota mai se fanua na tuulafoaiina ina ia mafai ai ona latou fesoasoani e fausia se falesa Katoliko. A uma loa, ona fuafua loa lea o faifeautalai e ofoina atu ni vasega faaPeretania mauafua iina i vaiaso taitasi mo le nuu i le lotoifale.



*O le mala o tagata ua faaaunuua mai o latou fale e latalata i o tatou loto. Tatou te taumafai e mulimuli i aoaoga a Keriso e faafeiloai le tagata ese—e ala i galuega fesoasoani ma e ala i le auunaga ma le mutimuti alofa o o tatou tagata.*

*I le popofou o la tatou talafaasolopito, sa faafia ona tutuliese mai tagata o le Ekalesia mai o latou fale ona o le le taliaina o tapuaiga. O lenei “tofi o tagata sulufai” o se tasi lea o mafuaaga ua lagona ai e le toatele o tagata o le Ekalesia i aso nei le faamalolosia e tuuina atu soo se fesoasoani latou te mafaia e fesoasoani ai i tagata o loo sailia se malutaga.*

## Ofoina Atu o le Malutaga

**I LE 2022**, na vaaia ai e le lalolagi se fana’e maoae i le aofai o tagata ua faaaunuua mai o latou fale e faalavelave faalenatura ma feteenaiga faaaaupegaina. E faaopoopo atu i foai taua tautupe i polokalama fesoasoani mo tagata sulufai, sa galulue foi tagata o le Ekalesia i totonu o o latou nuu e lagolago i latou o e na faaaunuua. “O le alofa ma le naunau e fesoasoani e lofituina i le vaai,” o le tala lea a Iulia, o se tagata o le Ekalesia i Auseteria. “Ua tosina atu loto o tagata i le tasi ma le isi.”<sup>6</sup>

### Fesoasoani i le Lotoifale

I le salafa o le lalolagi, sa volenitia ai Au Paia o Aso e Gata Ai i nofoaga o le lotoifale ma galulue faatasi ma isi i o latou nuu e foai atu, ao mai, faavasega, afifi, ma tiliva atu meaai, lavalava, aitema mo le tumamā, sapalai faafomai, ma isi mea taua e sili ona manaomia. O nei foai na fesoasoani i tagata o e na faaaunuua i le mavae ai o feteenaiga i Europa ma Aferika, mafuie ma afa fulifao i le Keripeane ma le Pasefika, lologa i Asia ma Sasae Tutotonu, ma le tele o isi [atunuu]. I Kanata, sa talimalo ai tagata o le Ekalesia i se taumafataga masani faa-Iukureini mo le nuu, ma fai sailigā tupe mo taumafaiga mo le toomaga o tagata sulufai.

### Fesoasoaniga Faalelagona

O fesoasoaniga faalelagona, ua lauiloa foi o le fesoasoani muamua faalemafaufau, o se lagolago taua mo tagata o e na feagai ma se faalavelave. I le 2022, sa auauna atu ai Anitonio, o se tagata o le Ekalesia i Potukale, i lona nofoaga autu na tali ai tagata sulufai i le lotoifale. O se vaega o lana auunaga, na maua ai e Anitonio se aoaoga faamasani i le fesoasoani muamua faalelagona. O lena aoaoga faamasani na aoaoina ai Anitonio i le auala e faali atu ai le mutimuti alofa ma fesootai atu i tagata taitoatasi sa ia auauna atu i ai. A o ia faalogologo atu i isi o faailoa mai o latou lagona, sa ia lagonaina ua saunia e alofa, ofo atu le faamoemoe, ma fautuaina atu ni auala e taulima ai.



**Luga a’e:** A o auauna atu o se peresitene o le Aualofa a le Siteki o Huddersfield Egelani, ua volenitia atu Alison Boome (ogatonu) e fesoasoani i aiga ua leai ni fale i Dunkirk, Farani, i le 2016. Atapue mai faaaloaloga a le Siteki a Huddersfield Egelani, faaaloaloga a le Church News.



Luga a'e: O se aiga mai Iukureini ua maua se malutaga i se isi atunuu o Europa.

*“O Le Ekalesia a Iesu  
Keriso o le Au Paia o Aso  
e Gata Ai o se tasi o paaga  
a le ISA mo le UNHCR e  
sili ona faatuatuaina ma  
ua loa ona i ai. E faaauau  
pea ona tatou toefuatai  
faatasi le faamoemoe,  
saogalemu, ma le mamalu  
i le silia ma le 100 miliona  
tagata taitoatasi ua  
faaunuua mai o latou  
fale ona o sauaga,  
feteenaiga, po o faiga  
faatautala.”*

—LACEY STONE,  
FAATONUSILI O FAIGAPAAGA  
ISA MO LE UNHCR

### Tali Atu o Tagata Europa

Ina ua mavae le amatalia o le taua i Iukureini, sa faaalua e tagata o le Ekalesia i Europa la latou tautinoga e auaina atu i isi. Sa latou faatulagaina le faitau afe o moega—e toatele i totonu o o latou lava fale—mo i latou ua faaunuua ona o le taua. Sa galulue vavalalata le Ekalesia ma faalapotopotoga fesoasoani mo tagata sulufai e pei o le Komesina Maua luga o Malo Auaatasi mo Tagata Sulufai (UNHCR) ma le Jesuit Refugee Services e faafesootai ai tagata ua leai ni fale ma auunaga e taulima ai o latou manaoga vave. I Europa, sa mafai ai e tagata Iukureini faatoa taunuu mai ona fesootai ma ofisa o le malo i le lotoifale mo se fesoasoani, faafetai i tagata o le Ekalesia o e sa mafai ona tautatala i la latou gagana.

Sa auai foi faifeautalai i le tuuina atu o le toomaga i tagata ua leai ni fale i le lalolagi atoa. Sa volenitia faifeautalai i nofoaga autu e toai atu i ai i Polani, Hanikeri, ma Romania, ma ofoina atu le fesoasoani i gagana, faamamāina o fale ma fanua, tufaina o meaai, ma le faavasegaina o foai. I Siamani, sa malaga atu faifeautalai i nofoaga o nofoaafi, lea sa latou aveina ai faailo e faaalua ai gagana latou te tautatala ai ma le fesoasoani e mafai ona latou tuuina atu.

“O le mea masani leni,” o le tala lea a Sylwia, o se tagata o le Ekalesia i Polani. “Pe a e vaai i tagata o loo manaomia le fesoasoani, e te fesoasoani atu. ... E le afaina pe o oe o se tagata o le Ekalesia pe leai. E alofa le [Tama Faalelagi] i tagata uma.”<sup>77</sup>



*E sili atu ona fesootai ma nofouta tagata talavou i mea o loo tutupu i le lalolagi nai lo se isi lava taimi muamua, ma latou te mananao e fesoasoani. E auai malosi tamaiti ma le autalavou o le Ekalesia i auaunaga i totonu o o latou nuu i le salafa o le lalolagi. E taitala e taitai o le Ekalesia a latou vaega o le autalavou i le lotoifale a o fuafuaina e tamaiti ma le autalavou ma auai i galuega fesoasoani.*

*E fautuaina tamaiti ma le autalavou e saili ni avanoa e auauna atu ai i latou lava e ala i le tatalo mo musumusuga. O nei gaoioiga ua fuafuaina e fesoasoani ai i tamaiti ma le autalavou i le Ekalesia ia tuputupu ae ia avea atili e faapei o le Faaola.*

*“O lenei mea, ua faamalamalamaina ai fanau uma a le Atua e auauna atu ia te Ia ma i le tasi ma le isi i le mea sili latou te iloa ma gafatia.”*

— PERESITENE DALLIN H. OAKS  
Fesoasoani Muamua i le Au  
Peresitene Sili<sup>9</sup>

---

## Faatinoga a Tamaiti ma le Autalavou

**I LE 2022**, sa faatulagaina ai ma auai le autalavou o le Ekalesia i le lalolagi atoa i le tele o galuega faatino e fesoasoani ai i o latou uso a alii ma tamaitai.

---

**I ITIOPIA**, na faaalaina ai e alii ma tamaitai talavou e 70 le ono vaiaso e toto ai laau aina suamalie e fafaga ai tagata o loo manaomia le fesoasoani i totonu o lo latou nuu. Sa fai mai Hana, o se tasi o tamaitai talavou sa fesoasoani i le galuega faatino, “Sa faataata i le Atua, auauna atu, ma le alofa i le tasi i le isi. O le a le galo ia te au lenei aafiaga.”<sup>8</sup>

---

**I ITALIA**, sa malaga taamilo ai le autalavou e 14 tausaga e oo i le 30 i le aai o Milan, i le tufatufaina atu o lisi o mea e faaoga e manaomia e fesoasoani ai i tagata sulufai Iukureini. O lenei mea na i’u ina lava mea na foai mai e le nuu e faatutumu ai pusa e 551, lea na teuina ma saunia e le autalavou.

---

**I LE IUNAITETE**, sa faapotopoto ai tamaiti laiti ma o latou aiga e faamamā fanua maliu faataamilo i Massachusetts. O le toatolu o nei tamaiti na faamamāina tuugamau faatasi ma lo latou tamamatua, o lē na faasoa mai faapea, o le aafiaga na fesoasoani ia te ia e faalolotoina ai lana sootaga ma i latou a o latou galulue ma talanoa e uiga i o latou tuua.

---

**I FITI**, e 60 alii ma tamaitai talavou o le Ekalesia na auauna atu i o latou nuu i le lotoifale e ala i le toe valiina o le Falesa Metotisi o Josaia i le nuu o Lomanikoro. Sa latou faaalaina le ono itula e faamama ai ma vali puipui o le fale, lea ua avea o se malutaga mo le silia ma le 200 tagata.



# JustServe

“O le JustServe ua le na o se polokalama po o se uepisaite, o se gaoioiga ma o se auala e mafai ai ona tatou ola i a tatou feagaiga. E toatele tagata o le ekalesia e mananao e auauna atu i o latou nuu, ae atonu latou te le iloa pe mafai faapefea ona latou amata. O le faaaogaina o le JustServe e mafai ona latou maua ai avanoa faaleaunaga e fetau ma mea latou te fiafia i ai ma avanoa. Ua ofoina atu e le JustServe i tagata le taitaiga ma fesoasoani ia i latou e fesoatai atu i galuega fesoasoani lea o le a faamanuiaina ma faamalolosa ai o latou nuu.”

—EPIKOPO GERALD CAUSSÉ, EPIKOPO PULEFAAMALUMALU<sup>10</sup>





Luga a'e: O se fomai mata o loo tuu atu se pea matatioata i le mae'a ai o le siaki fuaina o mata i Houston, Texas.

## JustServe [Na o le Auauna Atu Lava] i le Mea o E I Ai

- O loo maua le JustServe i atunuu e 14
- E 69,115 tagata faaaoga fou ua lesitala i le 2022
- Aofaiga e 14,061 faalapotopotoga ua i ai sui

**E FAAOPOPO ATU I LE AUAUNAGA** latou te tuuina atu i le tasi ma le isi, e taumafai tagata o le Ekalesia e auai ma faaofia isi i auaunaga i le salafa o o latou nuu. Latou te auai faatasi ma tagata o tulaga uma e foia faafitauli i le lotoifale ma tuuina atu se lima faauo.

Ina ia fesoasoani ia ausia lenei sini, e faagaoioia e le Ekalesia le JustServe o se nofoaga o auaunaga i le lotoifale i luga o le initoneti, lea e mafai ai e tagata taitoatasi ona fesootea ma galuega faatino i le lotoifale i la latou eria. E ala atu i le JustServe, e mafai ai e volenitia ona maua avanoa o auaunaga faaletagata lava ia ma mamao ese, ma e mafai e faalapotopotoga ona maua le fesoasoani latou te manaomia e ausia ai a latou sini faaleaunaga.

Ua uunaia e le JustServe le galulue faatasi ma le auai i nuu i galuega faatino i le lotoifale. O tagata taitoatasi o aulotu uma—po o le leai o se aulotu—e galulue faatasi, faalagolago le tasi i le isi, ma, o le mea aupito taua, e atiina ae le alofa o le tasi ma le isi a o latou auauna atu.

I le aluga o le 2022, e 16,285 galuega faatino na faaopopo i le tulaga, ma e toatele tagata na galulue faatasi e faataunuu se galuega tele i o latou nuu. E ala atu i le JustServe, na maua ai e Iakopo ni aitema taua e manaomia mo le Aoga Kerisiano a New Kiskeya

i Haiti, lea o loo avea ai o ia ma se supavaisa. Sa faaoga e se vaega o volenitia i San Bernadino, Kalefonia, le JustServe e ao mai ai foai o tusi, masini faamatatetele, ata faataitai o le 'auivi o le tagata ma le malosiaga i le la, ma isi mea. Sa lagona e Iakopo o se tali lea i tatalo, aua sa ia le iloa pe faapefea ona ia faia mea e manaomia mo ana tamaiti aoga seia oo ina ia maua se valaau mai volenitia o le JustServe.

Sa faamaopoopoina e Susana se galuega faatino o le JustServe i lona nuu o Idaho Falls, lea sa tusia ai e volenitia (e aofia ai le toatele o tamaiti) ni valenitine mo tagatanuu o le nofoaga autu mo tagata matutua e nonofo i le lotoifale. A o tuuina atu e Susana nei valenitine e 5,050, sa ia atiina ae se faigauo ma Bonny, o le sa maligi ona loimata ina ua tuuina atu ia te ia se valenitine ma se rosa piniki.

I Siamani, sa faatulaga ai e tagata o le Ekalesia i le lotoifale i Frankfurt ma Friedrichsdorf se galuega faatino mo tagata Iukureini ua faaunuuua i le eria. E luasefulu tamaitai na o mai faatasi e vali meaafale mo le Malutaga o Caritas i Frankfurt mo e Leai ni Mea e Nonofo Ai, lea sa tali ai nisi o aiga na sosola ese mai le taua i Iukureini. Sa tonu ia i latou e vali meaafale i lanu vaivai e fesoasoani e faamatagofie ai le malutaga ma siitia ai agaga o aiga o feagai ma se taimi faigata. O le galuega faatino na mafai ai e tamaitai ona faia ni faauoga ma aiga ma aumaia ia i latou sina faamoemoe i le taimi o le faalavelave.





I nofoaga o loo maua ai, e mafai ona e auai i galuega auauna atu i lou nuu e ala i le siiina mai o le polokalama JustServe e faaoga ai le numera faailo i le taumatau.



*Luga a'e: O loo galue se alii i le faaleleia o uila vilivae i Hong Kong.*

### MAUAINA O LE OLIOLI E ALA I LE AUAUNAGA

Ina ua maua Patti i se kanesa e le taatele, sa ia asiasi i le uepisaite o le JustServe e sue se galuega faatino e mafai ona ia faia i le taimi o ana malaga uumi i le alu ma le foi mai ona togafitiga o le kanesa. Sa ia tau atu ai i se galuega faatino o le su'iina o taga aluga mo le Faaaliga o Laau—o se suegatupe e manuia ai gasegase o tamaiti i le Falemai o Tamaiti Peraimeri i le Aai o Sate Leki.

A o auauna atu Patti, sa amata ona ia fausia se uepega fesooteai o uso a volenitia o e sa naunau e fesoasoani, ma faalatele atili ai lona aafiaga mo le lelei. A o lei maluu o ia ia Ianuari 2022, sa saunoa Patti e uiga i le olioli na tuuina atu e lana auaunaga ia te ia, ma faapea atu, "Ua ou tuua ma le tele na'ua o le olioli ma le lotofaafetai."<sup>11</sup>



*Luga a'e: I se aso e piki ai lapisi e ekalesia soofaatasi i Portland, Oregon, na o mai faatasi ai volenitia e ao mai i le va o le 500 ma le 600 pauna lapisi.*

*“I taimi o le faateleina o fevaevaeaiiga ... o le fiaailoa ma le malamalama ai i vaaiga i talitonuga faalelotu po o le faaleagaga a o tatou tuaoi, ua mafai ai ona aveai i tatou ma tuaoi sili atu.”*

—LEN GIERACH  
Edmonton Interfaith Centre for Education and Action<sup>12</sup>

## Galulue Faatasi i Ekalesia Soofaatasi

- E 554 galuega faatino faatasi ma faalapopotoga a ekalesia soofaatasi i le IS/Kanata
- E 225 galuega faatino faatasi ma faalapopotoga a ekalesia soofaatasi faavaomalo

O le **JUSTSERVE** e maua ai le avanoa mo nuu eseese e o mai faatasi ai tagata ma feauaunaa'i. O tagata o soo se tu masani o le faatuatua e maua le avanoa e faaoga ai le tulaga e auai ai pe faatulaga ni galuega faatino.

**I OREGON**, mo se faaitaiga, na faafesootai e le JustServe le aulotu o le Au Paia o Aso e Gata Ai i le lotoifale ma ni vaega o ni isi faatuatua i le eria—e aofia ai le Bilal Masjid Mosque. O nei vaega ua tuufaatasia e faatulaga se aso e faamamā ai lapisi, e fesoasoani ai e faamatagofie le aai ina ua mavae ni nai taimi o le faaleagaina. Sa mafai e tagata taitoatasi i aulotu uma ona galulue faatasi ma fausia ni faigauo fou ia o le a taitai atu ai i le galulue faatasi i le lumanai.

**I KALEFONIA**, e ono ni faatuatua eseese ma se Faletuolooa o James, e lē su'e polofiti, sa auai faatasi ma le Au Paia o Aso e Gata Ai e ao mai le silia ma le 200 o ofu, faatasi ai ma seevae, ofu mafanafana, sakete, peleue faapisinisi, ma vali foliga—ae le ta'ua ai le faitau selau o faamatalaga tusitusia o faamalosiaga. O nei aitema sa foai atu ina ia manuia ai tamaitai talavou o loo fai i ai le tausiga e isi, ma faamautinoa ai sa i ai o latou lavalava mo siva a le aoga ma faatalanoaga o galuega o loo loma. Sa talimalo volenitia i se gaoioiga “Lalelei Oe” lea e mafai ai e tamaitai talavou ona faataitai tomai mo faatalanoaga mo ni galuega ma faia ni fesootaiga ma tagata o le nuu.

**MA I IUTA**, sa o mai faatasi ai tamaitai mai le Episcopal Church of the Resurrection, Ekalesia Katoliko St. Olaf, Ekalesia Bountiful Community, ma le aulotu i le lotoifale o le Au Paia o Aso e Gata Ai e auai i la latou Galuega Faatino faaletausaga a Tamaitai o le Faatuatua. I totonu o le 45 minute, sa faatumuina ai e volenitia se loli atoa i pusa o meataulima, palanikeke, pusa mo le tumamā, ma isi mea mo tagata o le nuu.

# Fesoasoani i le Lalolagi Atoa

---

“O le galulue faatasi taua o le CARE ma Le Ekalesia a Iesu Keriso o le Au Paia o Aso e Gata Ai ua faamautinoa ai ua mafai ona faaauau pea ona tatou faatumuina avanoa taua ma taulimaina manaoga o nuu e vaivai i le mea sa avea ma se isi tausaga sili ona faigata. Matou te faafetai mo tagata o Le Ekalesia a Iesu Keriso o le Au Paia o Aso e Gata Ai o ē e foai atu ma le limafoai e aumaia ai le fesoasoani ma le faamoemoe i isi i lenei lalolagi.”

—MICHELLE NUNN, PERESITENE MA LE CEO A LE CARE ISA



# Galuega Faama'ite i le Lalolagi Atoa

- O galuega faatino na faamae'a i atunuu e 157 ma teritori i le lalolagi atoa
- Na galulue faatasi ma faalapopotoga e 2,629 i le 2022
- E 46 galuega faatino o meaai paleni mo tamaiti na faatupeina
- Faatupeina ni galuega faatino tetele e 6 mo tui puipui i le lalolagi atoa

**MATOU TE TALITONU** e tatau i tagata uma ona maua meaai paleni, vai mamā, a'otauina lelei, ma le tausiga faalesoifua maloloina. O le tele o vaifofo i nei mataupu o loo talanoaina i faama'ite ua mamanuina ma faafoeina e eria esese faaletaitaiga a le Ekalesia i le lalolagi atoa. E le gata i lea, o loo faataunuuna foi e le Ekalesia faama'ite filifilia i le lalolagi atoa i tausaga taitasi. O le galulue ai ma isi faalapopotoga i le 2022, sa matou taulai atu ai i le talanoaina o faafitauli faigata e pei o faama'i faaumiumi, papupuni i aoaoga, manaoga o tagata ua faaunuua, ma le tele o isi faafitauli. O nei faama'ite e taulai i le atina a'e o auala e mafai ona tausia e foia ai, ia e faalauiloa ai le ola tutoatasi ma le mamalu mo tagata uma.

*“O le \$32 miliona lauiloa a le Ekalesia ua tuuina mai i lenei tausaga i le Polokalama o Meaai a le Lalolagi ISA ... ua faaalua ai le ala e ola ai le Ekalesia ma ona tagata i o latou faatuatuaga i aso taitasi ma lagolagoina le tuuto aupito mauahuga i le auaua atu. O le faanaunauga limafoai a le Ekalesia ua mafai ai e i tatou ona fesoasoani i le faitau miliona o aiga, ma tuuina atu ai ia i latou le mautu ma le faamoemoe mo se humanai sili atu.”*

—BARRON SEGAR

Peresitene ma le Pule Faatonusili (CEO) o le Polokalama o Meaai a le Lalolagi i le ISA

O se tasi o na tulimataiga i le 2022 sa faia mo meaai paleni a tamaiti. Ina ia taulimaina lenei manaoga taua, sa tuuina atu ai e le Ekalesia se foai e \$32 miliona—o lona sao sili ona tele mo le taimi e tasi i se faalapopotoga o galuega alofa—i le Polokalama a Malo Afaatasi mo Meaai a le Lalolagi. Ma le isi, sa tuuina atu se foai e \$5 miliona i le United Nations International Children's Emergency Fund (UNICEF) e lagolago ai lana faalauiloaga o meaai i le lalolagi atoa e ta'ua o le “Leai se Taimi e Faama'umau” O nei saofaga tuufaatasi o le a fesoasoani ai i le toeitiiti lua miliona tagata i le tele o atunuu. E faaauau pea ona tatou galulue faatasi ma isi faalapopotoga e tuuina atu aoaoga ma tupe e fesoasoani ai i matua ia iloa faailoga o le tinovale ma maua le tausiga manaomia o le soifua maloloina.

O tagata o le Ekalesia i Filipaina, Kuatamala, Zimbabwe, Matakasa, ma Mozambique ua auai faatasi ma tagata faigaluega o le soifua maloloina o le nuu ma faalapopotoga i aai e siaki tamaiti mo faailoga o le tinovale. Sa latou galulue foi ma aiga e atiae fofo mo le tele o mafuaaga o le tinovale. O nei mea e aofia ai faalauiloaga o le nofouta, vasega kuka, mauaina o meaai paleni, ma auunaga faatino e pei o tui puipui ma inumaga o vai 'anufe.

I le 2022, na faamaeaina ai e le Ekalesia le tausaga lona ono o lana faama'ite i aso malolo o le, Faamalamalama le Lalolagi. I aai e 23 i le salafa o le Iunaita Setete, sa faia ai e tagata o alalafaga mea e faaleleia atili ai olaga o i latou sa manaomia le fesoasoani i le salafa o le lalolagi e ala i le saofaga atu i masini foai atu a le Ekalesia. Talu ai ona sa totogi e le Ekalesia ia tupe faaalu o le faagaoioiga o masini, o lea sa mafai ai e faalapopotoga o galuega alofa ona maua pene uma e foai atu i a latou taumafaiga agaalofo.





*Luga a'e: E toalua le fanau laiti i South Sudan ua auai ma le fiafia i le la aoga fou.*

O le tausaga lenei, o foai a tagata o le Ekalesia ma uo i le Faamalamalama le Lalolagi lea na tuuina atu ai taumafataga, lavalava mo tamaiti, tui puipui o le ma'i pipili, moa e fesoasoani ai i aiga o loo tauivi, pusa o le tumama mo tamaitai, ma isi mea. Na saofagā tagata mai le salafa o le lalolagi, faatasi ai ma le aofai o foai na sili atu ma le faitau miliona.

O le isi tulimataiga i le 2022 o le faaleleia atili o le tausiga faalesoifua maloloina i le lalolagi atoa. Sa mafai e le Koluse Mumu a Amerika ona maua ni masini fou mo le aoina mai ma le vaaiga o paina toto e ala i se foai e \$5.1 miliona a le Ekalesia. O sailiiliga o faama'i o matāuaola ona o le faaletonu o le toto, e taua tele e fesoasoani ai e faaititia lenei tulaga, lea e aafia ai tagata o le nuu e tupuga mai Aferika. O lenei galuega faatino ua tulimatai ia oo atu i le toatele o tagata o le nuu o Tagatauli e ala i le valaauliaina o i latou e auai o ni tagata foai mai toto i suesuega faifai pea ina ia faamutaina ai lenei faama'i.

### **AOAINA MO LE OLAGA I SE ATUNUU FOU**

Ina ua na o le ono tausaga le matua o Ayibu, sa faamalosia o ia ma ona matua e sosola ese mai Sutana i Saute e aunoa ma se mea ae na o lavalava o loo ofuina. Mulimuli ane, sa latou maua le sulufaiga i Biringi, Ripapelika Temokarasi o Congo.

O le polokalama a le UNICEF o le Aoaoina mo le Olaga, faatasi ai ma le faatupeina mai Le Ekalesia a lesu Keriso o le Au Paia o Aso e Gata Ai, sa mafai ai ona tuuina atu i faiaoga o Ayibu se aoaoga faamasani i le tausiga faalemafaufau ma le puleaina o feteenaiga. O lenei mea na saunia lelei ai i latou e fesoasoani ia te ia e faamasani i lana a'oga fou. Ua fai mai nei Ayibu ua ia fuafua e avea ma se fomai i se aso ina ia mafai ona ia fesoasoani i isi o e ua sosola ese mai lo latou atunuu.



## Aferika ma Sasae Tutotonu

- E 94 galuega faatino o le saogalemu o meaai
- Vai mamā ua tuuina atu mo tagata e 626,475
- E 4,785 nofoa faataavalevale na foai atu

**E SIOMIA AI LE FAITAU MILIONA O MAILA FAATAFAFA** o Aferika ma Sasae Tutotonu e matagofie ma felanulanua'i faaleaganuu. Peitai, i ni itulagi patino, o feteenaiga faalemalo ua oo atu ai i tulaga maualuluga o le faaunuuu.

O le toatele i Aferika ma Sasae Tutotonu o loo tauivi e saili ni galuega ta'uaogaina—e masani lava ona o le leai o ni galuega, aoga, ma aoga faamasani. O nisi e tauivi e sue se galuega ona o o latou tulaga o ni tagata ua faaunuuu. I nisi o eria, o le leai o se galuega e maualuga e tusa ma le 60%, lea e taitai atu ai i tulaga faateleina o le mativa ma le fiaaai. O nei tulaga na faateleina e ala i le maualuga o le pepesi o le KOVITI-19, fuataga na tapunia ai, ma le lēlava o sapolai.

I le 2022, sa matou galulue ai e talanoaina nei faafitauli ma ni vaifofo e taulai atu i le mafai ona faatumauina mo se taimi umi. O saofaga iloga e aofia ai se foai i le Rural Entrepreneur Access Project, e fesoasoani ai i le silia ma le 7,000 tamaitai ma tamaiti i Kenya e fiafia ai i le malupuipua ma le saogalemu sili atu o meaai. Ma faatasi ai ma le foai a le Ekalesia i le Polokalama o Meaai a le Lalolagi, ua tuuina atu ai le fesoasoani o meaai paleni i le 1.6 miliona o tagata i atunuu e iva, e aofia ai Itiopia, matusasae o Nigeria, Somalia, Sutana i Saute, ma Yemen.

Na tatou faamuamuaina foi galuega faatino o le suavai mamā ma le tumamā, galulue faatasi ma le WaterAid, Water for People, ma isi faalapotopotoga faatuatua e toefaaola le suavai, eli vaieli, ma fausia ma faaloloto

vaieli i eria ua aafia i le lamala. E ala i nei taumafaiga, e silia ma le 626,475 tagata i Aferika atoa ma Sasae Tutotonu na mafai ai ona maua suavai mamā ma le tumamā i le 2022.

O le isi faamuamua o le Ekalesia i Sasae Tutotonu ma Aferika o le tausiga faafomai. I le 2022, e 4,785 tagata i nei eria na mauaina se nofoa faataavalevale fou, ae o le isi 11,586 tagata na maua fesoasoaniga e feoai ai, ma sa maua e ni tagata faaopoopo e 182,917 siaki o a latou vaaiga i le 2022. Ma le isi, o meafaigaluega ma polokalama faaleaoga mo fomai ma taulasea o le lotoifale, faapea foi ma fale e pei o faleoloa e lipea ai nofoa faataavalevale mo eria maotua, sa mafai ona maua e ala i tupe a le Ekalesia.

*“O la tatou faigapaaga ma Le Ekalesia a Iesu Keriso o le Au Paia o Aso e Gata Ai e oo atu i tua i le tele o tausaga ma ua avea ma faavae i le galuega o loo tatou faia iinei i Malawi. Ua tele nuu ua manuia nei mai le faaogaina o le suavai mamā ma ua i ai filifiliga saogalemu mo le tumamā mai lenei faigapaaga aoga. O tamaiti i nei nuu o le a le iloaina lava se taimi na le maua ai e lo latou aiga ni vai mamā.”*

—ULEMU CHILUZI

Faatonusili o le Atunuu o Malawi o le Vai mo Tagata

E faatatau i faama'ite faaleaoaoga, sa fesoasoani ai le Ekalesia i le tele o a'oga e ala i le fauina o potuaoga, foai atu o komepiuta ma isi sapaalai, ma le fausiaina o fale lēta'ua. O nei foai na maua ai e le fiaselau o tamaiti aoga ala sili atu i aoaoga.

O le galulue faatasi ai ma isi faalapotopotoga, sa tali atu ai le Ekalesia i le tele o faalavelave faafuasei i le itulagi atoa. Mo se faaitaiga, o mea faufale, meaai, ma isi mea

e manaomia sa foai atu e fesoasoani ai i le faitau afe o tagata o e sa aafia i lologa i Aferika i Saute. Ma e faitau afe tagata Suria sa faaunuua sa fiafia i le mauaina o vai inu mamā ma le tumamā, faafetai i se taumafaiga soofaatasi ma le CARE e lipea paipa ma alāvai o otaota i a latou tolauapiga.



### UA TUUINA MAI E PI SE AVANOA LONA LUA

Ina ua uma ona faateaease mai lona aiga i Suria, sa sailia e Dohad—o se tamā talavou—se amataga fou i Ioritana. “Ina ua ou faatoa taunuu, sa matuai faigata lava le ola ai. Sa ou matua’i popolevale,” o lana tala lea.

O le mea e lelei ai, na maua e Dohad le fesoasoani e ala i se galuega faatino soofaatasi i le va o Le Ekalesia a Iesu Keriso ma le Aljahuz o se

auaunaga alofa a le Au Ioritana, lea na tuuina atu ai ia Dohad ni ofagapi ma aoaoga faamasani i le auala e faafoe ai.

I totonu o le lua tausaga, ua faapoopoo e Dohad ana ofagapi mai le lua i le fa. Faatasi ai ma tupe mama, na siitia atu ai o ia i totonu o se fale ma faaaoga lana fanau. Fai mai Dohad, “Ou te mitamita i le i ai o sa’u tupe maua, i le mauaina o se avanoa lona lua i le olaga ona o lagomeli.”<sup>13</sup>



## Asia, Ausetalia, ma Atumotu o le Pasefika

- E 51 galuega faatino o toomaga mo faalavelave faafuasei
- E156,182 tamaiti aoga na tautuaina

**I ASIA, AUSETALIA, MA ATUMOTU O LE PASEFIKA**, o le agalelei o tagata e tutusa lelei ma le aulelei o le laufanua. Peitai, e toatele tamaiti ma tagata matutua i nei eria e tauivi ma atugaluga o le soifua maloloina e fesootai ma taumafa paleni. O mala faalenatura na tuua ai le faitau afe na manaomia le tausiga faavae i le aluga o le tausaga ua tuana'i.

I le 2022, sa galulue faatasi ai Le Ekalesia a Iesu Keriso o le Au Paia o Aso e Gata Ai ma vaega e pei o le Adventist Development and Relief Agency, Habitat for Humanity New Zealand, ma le Church World Service e tuuina atu ai fofo na fesoasoani i tagata taitoatasi ia ola tutoatasi ma saunia lelei ai mo le lumanai. E le gata i lea, e toatele tagata na mauaina ni fesoasoani taua ina ua mavae mala faalenatura, e pei o le pa tele o se maugamu ma le galulolo i Toga.

Sa taulai atu foi le Ekalesia i le tausiga o le soifua maloloina, i le faamuamua o eria na matuai aafia lava i le KOVITI-19. I Monokolia, mo se faaitaiga, sa tatou galulue faatasi ma le Auaunaga o le Soifua Maloloina ma le tele o isi faalapotopotoga e saunia palanikeke, lavalava, moega, sapalai o okesene, ma vailaau mo gasegase i le falemai. Sa tuuina atu e faifeautalai o fesoasoaniga alofa le lagolago faifai pea mo nei taumafaiga.

I le tali atu i se galu lona lima o le KOVITI-19 i Hong Kong, sa galulue ai le Foodlink Foundation ma tagata o le Ekalesia i le lotoifale ma faifeautalai e tilivaina atu

le 2.5 tone o meaai na foai atu ia i latou sa manaomia le fesoasoani. I Fiti, e 1,000 aiga na maua meaai ma fesoasoaniga tautupe mo faatoaga i le lotoifale, ma faatagaina ai i latou e lagolago a latou fanau ma faatumauina atili mea latou te ola ai. O loo faaauau pea ona tatou galulue faatasi ma faalapotopotoga fesoasoani i le lotoifale e faalauiloa atu le tausiga o faatoaga ma isi fesoasoaniga mo meaai.

E le gata i lea, ua tatou faamamafaina le manaomia o le a'otauina ina ia faaitiitia ai le mativa i eria maotua. E tele a'oga i nei eria sa faatotogaina i meaaoga, o tusi, toniga, faletaele, ma isi mea. Mo se faaitaiga, sa manuia tamaiti aoga o le Aoga Mauuluga a Chuuk i le Federated State o Maikolenisia mai komepiuta feaveai, laau suisui, ma mea mo taaloga na foai atu e faaleleia ai lo latou a'otauina. Sa maua e tamaiti aoga o le Aoga Mauuluga a Trop i Kemupotia se faleaoga fou.

---

*“O le ute lena o le misiona o lo tatou galulue faatasi [ma le Ekalesia]: o le i ai o se aafiaga ma se aapa lautele atu mo tamaiti i le salafa o le lalolagi— aemaise lava fanau o loo i ai i nofoaga e sili ona ma'ale'ale ma luitauina.”*

—RACHEL STEINBERG

Pule Faatonusili o le UNICEF USA mo le Global Cause Partnerships<sup>14</sup>

---



O faama'ite o le suavai mamā o se tasi lea o taulaiga taua o galuega alofa i lenei itulagi. I Pakisitana, e 50,000 tagata i nuu e 15 na maua ni masini e faamamā ai suavai ina ua mavae lologa sili ona matautia. I le itumalo o Khanawal, Pakisitana, e 45 a'oga a le malo

na tuuina atu i ai faletaele e 147 ma nofoaga fou mo le tumamā na faapipii ai. O foai na o faatasi ma aooga faamasani, ina ia mautinoa ai o le a maua e tagata e mauaina foai ia tomai e tausia ma vaaia ai a latou anomea fou ma fale mo le tele o tausaga a sau.



**FAALELEIA O OLAGA MO I LATOU E I AI MANAOGA FAAPITOA**

O Tatana, o se tama e 42 tausaga le matua e toalua lana fanau, e nofo i se tamai nuu i Initonesia. I le tausaga talu ai, sa amata ai ona pu'eia i se faama'i lea na aafia ai le gasolosolo o lona toto, ma sa tatau ai ona tipi lona vae. O le mutu ai o le vae o Tatana na le mafai ai ona galue pea—seia oo ia mauaina le fesoasoani.

Na galulue Le Ekalesia a Iesu Keriso o le Au Paia o Aso e Gata Ai ma le Yayasan Peduli Tuna Daksa, o se faalapotopotoga e le su'ea ni ana polofiti, e tuuina mai ai vae faapipii e 500 i Java, Sumatra, ma Kalimantan i le 2022.

O se tasi o tagata na muai mauaina se vae faapipii o Tatana. Faatasi ai ma lona vae fou, ua tulimatai atu ai Tatana e toe foi i lana galuega o se kamuta..



Luga a'e: O se vaega o faifeautalai mo auunaga na valiina meaafale i le nofoaga autu o tagata sulufai e leai ni aiga i Carita i Friedrichsdorf, Siamani.

## Europa

- Oloa ua tuuina atu mo tagata ua faaunuua i aai e 50
- E 42 galuega faatino o le saogalemu o meaai
- Galulue faatasi ma faalapotopotoga e 294

I LE 2022, o feteenaiga faaauppegaina na faaveesiina ai olaga i aso taitasi o le toatele i Europa atoa. Na tali atu Le Ekalesia a Iesu Keriso o le Au Paia o Aso e Gata Ai i le faatupeina ma sapalai, ma sa faapotopoto tagata o le Ekalesia i Europa atoa e tuuina atu o latou taimi ma mea e faaoga.

I le 2022, na faaalu ai e le Ekalesia le silia ma le \$16.8 miliona i fesoasoani e tali atu ai i le faalavelave i Iukureini ma Rusia.

O le galulue ai ma faalapotopotoga autu, e pei o le esuit Refugee Service, Project HOPE, ma isi, sa tufatufa atu ai e taitai o le Ekalesia ma faifeautalai o fesoasoani alofa le faitau afe o aitema o malutaga mo faalavelave faafuasei, palanikeke, moli e ola i le la, kata o telefoni, napekini, lavalava, ma isi mea taua mo le toomaga i Europa.

E le gata i lea, sa tatalaina e taitai o le lotoifale ia falelotu i Iukureini, ma fatuina ai ni nofoaga e mafai ai e tagata ua leai ni fale ona maua ni malutaga, meaai, ma ni faletaele. O i latou na sosola ese mai le taua sa mafai ona latou maua le auunaga a pasi e malaga fua ai, lea na aveina atu ai i latou i nofoaga autu sa talia lelei ai i Polani, Hanikeri, Solovakia, Romania, ma isi eria. I nei nofoaga autu talileleia, sa fesoasoani ai faifeautalai ma tagata o le au paia volenitia i tagata ua leai ni fale e fesoatai ma ofisa fesoasoani i le lotoifale ma saili ni fale (e masani lava o tagata o le Ekalesia i le nuu).

Sa galulue le Ekalesia ma isi faalapotopotoga e fela'ua'i tagata ma tuu atu malutaga i e ua faaunuua. O faalapotopotoga e lē o ni ō le malo, e pei o le Save Children, faatasi ai ma faalapotopotoga a Romania i le lotoifale, sa galulue faatasi ma faifeautalai e siitia atu ma tuu i fale le faitau afe o tagata Iukureini, e aofia ai le toatele o tamaiti ua matuaoti. O le galulue faatasi ai ma le ofisa o le toomaga a Falani, o le Terre des Hommes na maua ai tusi o vaogagana e 4,800 mo fanau ma matua ua faaunuua i Italia, e fesoasoani ai ia latou milofaatasi ma o latou nuu fou.

I le galulue faatasi ai ma le upegafesootai o fela'ua'iga a le malo o Iukureini, e 900 tone o meaai ma isi oloa taua sa foai atu e fesoasoani ai i nuu na sili ona matelaina. O lenei mea o se faaopoopoga i le fesoasoaniga tau tupe na tuuina atu i le amataga o le taua i le Polokalama o Meaai a le Lalolagi e sapalai ai le fa masina o meaai faasoasoa i le 11,000 tagata, i totonu ma fafo atu o Iukureini.

*“E i ai se loto mutimuti alofa o Iesu mo tamaiti. E tutulu o Ia pe a silasila mai ia i latou o matelaina. Ma e olioli o Ia e oo lava i taumafaiga aupito itiiti e fesoasoani ai ia i latou. O se faafetai tele i le Polokalama o Meaai a le Lalolagi ma i latou uma o e sa saofagā i soo se auala i lenei faamoemoe.”*

—PERESITENE CAMILLE N. JOHNSON  
Peresitene i le Au Peresitene Aoa o le Aualofa<sup>16</sup>

E ala i taumafaiga na taulai atu i le tausiga o le soifua maloloina, na maua ai e falemai ma fomai i Iukureini le faitau afe o pusa fesoasoani muamua, vailaau faafomai, ma isi sapalai taua faafomai ma masini. Sa ausia lenei galuega ma e faafetaia ai le galulue faatasi ma faalapotopotoga e pei o le Koluse Mumu, o le International Medical Corps, ma isi. Sa galulue tagata e faatautaia fesoasoaniga alofa mai le Ekalesia ma le Association of Neonatologists o Iukureini e tuuina atu vaitui i pepe e mafatia i faama'i o le māmā ina ua uma ona fananau mai i nofoaga i fogafale i lalo o falemai i le taimi o le taua.

Sa matou galulue foi e faaleleia le mauaina o aoaoga i Europa i sautesasae. O se aoga i nuu i tua i Montenegro (lea sa le maua ai e tamaiti le initoneti i le fale) na maua ai se masini feaveai, lau, ma se masini lomitusi mo se potu fou mo komepiuta. Ma i Posenia ma Herzegovina, na maua ai e tamaiti aoga e i ai manaoga faapitoa se polokalama e togafitia ai neura, ma isi tama'i masini taua.

### FESOASOANI I AIGA I FAALAVELAVE

Sa galulue faatasi Le Ekalesia a Iesu Keriso o le Au Paia o Aso e Gata Ai ma le tele o faalapotopotoga e tuuina atu fesoasoaniga ia i latou na soפוia le tuaoi o Iukureini-Rusia i le 2022. Sa maua e nei tagata ua faaaunuu ni meaai, vai, ato moe, afi faaleoleo, faleie, aitema o le tumamā, ma lavalava o le taumalulu.

Sa saofaga foi le Ekalesia i galuega faatino mo tamaiti ua faaaunuu, e aofia ai se polokalama na faafaigofieina ai le malaga i nofoaga o talafaasolopito i le lotoifale ma se paka taaalo fiafia ai. Sa tuuina atu foi i tamaiti ni pusa mo le a'oga, o loo i ai toniga a le a'oga, tusi a'oga, ma isi sapalai.





## Amerika i Matu

- 880 galuega faatino e fesoasoani ai i tagata na i ai aafiaga i le leai o ni fale
- 57,299,342 pauna o meaai ma isi oloa na foai atu
- 21 faama'ite o le soifua maloloina i le 2022

**O LE NONOFO AI I AMERIKA I MATU** e masani lava ona o mai ma le mauaina o punaoa mo le tausiga o le ola, o le toatele lava e i totonu o le itulagi o loo tauivi pea ia ausia o latou manaoga autu. I le 2022, o le siitia'i o tau o oloa, lē mautu o le tamaoaiga, ma le siitia o le tau o fale ma fanua na faamalosa ai le toatele o tagata ia oo i lalo ifo o le laina o le mativa. O lenei mea na taitai atu ai i se galu fana'e o tagata taitoatasi ma aiga ua leai ni mea e nonofo ai. Sa i ai foi se siitia tele o tagata taitoatasi na faaunuu o loo sailia se malutaga i Amerika i Matu ona o se taunuuga o feteenaiga faaaupegaina ma faalavelave faafuasei i le lalolagi atoa.

O taumafaiga o Auaunaga a Tagata Katoliko, le Ekalesia Greek Orthodox, ma isi faalapotopotoga sa fesoasoani i le sao o le Ekalesia e \$5 miliona i tupe ma oloa e tuuina atu ai fale saogalemu, lē tumau mo tagata ua faaunuu i Amerika i Matu. Ua faagaioia foi e tagata o le Ekalesia ia nofoaga tutotonu faafeiloai i ni isi o aai o Amerika i Matu, e aofia ai Las Vegas ma Mesa i le Iunaite Setete, ma Calgary i Kanata. I nofoaga autu e faafeiloai ai, e maua ai e tagata faatoa taunuu atu le fesoasoani i le aoaoina o le Igilisi, sailia o galuega, fesoatai ma fesoasoaniga faaletulafono, ma le tele o isi mea.

O le faateleina o le le mautu o le lava o meaai i Amerika i Matu, o le taulimaina o manaoga autu o tagata i le taimi lava lea, na avea ma se faamuamua taua. I le 2022, e faitau afe pauna o oloa na auina atu i fale e faasoaso ai meaai i le salafa o le Iunaite Setete ma Kanata i vaiaso taitasi. I eria e le mafai ona auina atu i ai ni oloa i vaa,

sa faamaopoopoina ai e faifeautalai o fesoasoaniga alofa a le Ekalesia ma faatupeina meaai e tuuina atu mo i latou e manaomia le fesoasoani.

Ina ia fesoasoani i le faatupulaia o le faitau aofai o tagata taitoatasi ma aiga o loo aafia i le leai o ni mea e nonofo ai, sa fesoasoani le Nevada Homeless Alliance ia i latou sa manaomia le fesoasoani e siitia atu i totonu o fale saogalemu ma mautu faatasi ai ma foai tetele a le Ekalesia o oloa. Sa tatou saofagā foi i le toefaaalelea o le Maota o Ella J. Baker i Boston, Massachusetts, o se nofoaga autu mo le autalavou lea e fesoasoani i le toatele o tupulaga talavou o loo aafia i le leai o ni aiga. I Kanata, sa tatou galulue faatasi ma faalapotopotoga e pei o le Red Cedar Shelter ma le H.O.P.E Society of LaSalle e tuuina atu ni malutaga ma ni fale i ni tagata na afaina.

*“Mo le silia ma le 100 tausaga, sa i ai se sootaga i le va O Le Ekalesia a Iesu Keriso o le Au Paia o Aso e Gata Ai ma le Faletupe o Meaai a Iuta. ... E galulue faatasi uma i laua e fesoasoani ia i latou e le tagolima ae maise lava i latou o loo feagai ma le le saogalemu o meaai.”*

—GINETTE BOTT

Perisitene ma le Pule Sili o le Utah Food Bank<sup>16</sup>

O loo i ai lava nisi nuu i le Iunaite Setete e le o maua lava le suavai mama, eletise, ma isi mea autu. O le galulue ai ma faalapotopotoga e pei o le DigDeep, sa

mafa'i ai ona tatou tuuina atu ni suavai mama i nuu e lei oo i ai le auunaga, e pei o Tagata o Navajo. Sa galulue taitai i le lotoifale ma nei nuu e faafesootai i latou i a latou lava eletise ma alavai i le lotoifale. E ala i lenei galuega, sa faamanuiaina ai le faitau selau o olaga.

O le faateleina o le mauaina o le tausiga faalesoifua maloloina sa avea ma taulaiga a le Ekalesia i le itulagi. Faatasi ai ma isi galuega faatino iloga, e 1,670 tagata e i ai manaoga faapitoa na mauaina ni nofoa faataavalevale i Mekisiko. I Kanata, sa fesoasoani le Weeneebayko Foundation ma isi faalapotopotoga ina ia maua fesoasoaniga mo le soifua maloloina mo tagatanuu. I le Iunaite Setete, o taitai i le lotoifale ma faifeautal'ai o fesoasoaniga alofa sa galulue faatasi ma le National Association for the Advancement of Colored People (NAACP) e suia se fale i Memphis, Tennessee, e avea o se fale e tausai ai tina faillele ma pepe faatoa

fananau mai. I le fale fou, e mafai e tina ona fiafia i se taumafataga vevela, maua faatonuga i le auala e tausai ai a latou fanau, ma tuua ai ua lagonaina le faafouina ma le lagolagoina.

I le galulue faatasi ai ma volenitia ma isi faalapotopotoga, e pei o le Koluse Mumu i Kanata, sa tali atu ai le Ekalesia i le tele o faalavelave faalenatura ma isi faalavelave faafuasei i le Iunaite Setete, Kanata, ma Mekisiko i le 2022, e aofia ai le Afā o Ian i Florida ma lologa faatauma'oi i Sonora, Kentucky, ma Alaska. I le mavae ai o nei mala, sa tufatufa atu e volenitia a le Ekalesia le faitau afe o meaai na foai atu, pusa faamamā, fala moe, ma aitema o lavalava ia i latou na aafia ai. Sa tuuina atu foi ni vai inu mamā ma isi mea taua, e lagolago ai le tele o nuu pe a le lelei le suavai a le atunuu.



### FESOASOANI I TAMAITI FĀI MAI IA FAAMANUIAINA

O Joaquin o se tasi o le faitau afe o tamaiti na sosola ese mai taua ma faigata i o latou atunuu moni. I Mekisiko, o le aofai o tagata fāi mai o loo faaauau pea ona faateleina, ma o'o atu ai ina ova le toatele ma le leai o ni punaoa mo tamaiti e pei o Joaquin.

Ina ia fesoasoani i lenei faafitauli, na foai atu ai e Le Ekalesia a Iesu Keriso o le Au Paia o Aso e Gata Ai ni meaai, pusa faamamā, ma pusa mo le tumamā i le Save the Children.

Faafetai i lenei foai, e silia ma le 900 tagata matutua ma le silia ma le afe tamaiti—e aofia ai Joaquin—sa mafai ona maua ia meaai, vai, ma auunaga mo le tumamā sa latou manaomia.



Luga a'e: O se vaega o taitai o aoina foai i le Falemai Faitete o le Barrio Obrero i Asunción, Parakuei.

## Amerika i Saute, Amerika Tutotonu, ma le Atu Karipeane

- E 10,733 siaki o mata na ofoina atu
- Na tuuina atu le toomaga mo faalavelave faafuasei i atunuu e 22
- O fesoasoani i meaai na tuuina atu mo aiga e 151,389

**E UI O MANAOGA O TAGATA** o Amerika i Saute, Amerika Tutotonu, ma le Atu Karipeane e eseese, ae o le le mautu talu ai nei o le tamaoiga i le itulagi ua aafia ai le tele o atunuu. I nuu i tua, ua maua luga ai le leai o ni galuega. I le alia'e mai o le faama'i oti o le KOVITI-19, o le tele o fale mo le tausiga o le soifua maloloina na manaomia ni meafaigaluega ma sapalai. Ma i nisi o eria, o mala faalenatura na mafua ai le faaleagaina ma le aveesea o le faitau afe mai o latou fale.

I le 2022, sa tatou taulai atu e fesoasoani i le tele o nuu i Amerika i Saute e faaleleia fale ma nofoaga mo le soifua maloloina. E ala atu i foai i falemai i le lotoifale, ua mafai ai e tagata taitoatasi i Amerika i Saute ona maua masini e faasusu ai le 'ea, ufi fofoga o le okesene, mea e faaoga mo le puipuiga o le tagata lava ia, masini mo gasegase tautamaitai, ma isi sapalai faafomai e manaomia.

E faapitoa ona ta'ua, o se foai tele a le Ekalesia na fesoasoani i le Falemai Faitete o le Barrio Obrero i Asunción, Parakuei, na fausia ai se afi e faagaoioia ai le okesene, ua faaleleia ai lona gafatia e tausua ai tagata mama'i na mafatia mai le KOVITI-19 ma isi faama'i tau i le māmā. O le a fesoasoani le afi i ma'i tausavali ma fale mo le tausiga o le soifua maloloina i eria maotua e faafetauia ai o latou manaoga mo le okesene, ma o le tulaga o lona mamānu faatufugaga e faafaigofie ai ona faagaoioi ma tausua ma vaai lelei.

O foai a le Ekalesia, ua faitau selau tagata e i ai manaoga faapitoa ua mauaina nofoa faataavalevale, ma le faitau selau o tagata e maua lalo tupe maua o loo aafia i faafitauli o mata, o le a maua le tausiga a le Vision Honduras Eye Clinic. Sa faafetaia e le pulenuu o Jutiapa, o Oscar Ayala le Ekalesia i lo latou galulue faatasi ma lo latou nuu ma faapoopoo atu, 'Ua ou maua le avanoa e talia ai lena fesoasoani, lea o le a faia ai le tele o mea lelei mo lo matou nuu o Jutiapa.'<sup>17</sup>

I le 2022, sa saunia ai e le Ekalesia ni pusa o meaai na foai atu i aiga fiaaai i eria maotua o Kolomupia ma isi atunuu. I Atenitina ma Chile, o i latou e le tagolima e mafai ona maua meaai ma isi mea e manaomia i faleteuolua e iva o epikopo o loo faagaoioia. Sa auai foi le Ekalesia i galuega faatino e fitu o suavai mamā ma le tumamā i Amerika i Saute, Amerika Tutotonu, ma le Atu



Karipeane—e aofia ai se galuega faatino i le Ripapelika Tominika, lea na maua ai le suavai mamā mo tagata e 11,000 i le taulaga laitiiti o Chirino.

Sa faatupeina foi e le Ekalesia ni galuega faatino se tele e faaleleia ai aoaoga mo tagata talavou i le 2022, e aofia ai se tauaofiaga mo le aoaoina o le aofia logonoa i le Ripapelika Tominika. Sa maua foi e tamaiti aoga i Jamaica se foai, na mafai ai e i latou ona lipa se papuipui o tuaoi faataamilo i se aoga. O lenei mea na maua ai e tamaiti aoga le filemu sili atu o le mafaufau i le taimi o o latou aafiaga faaleaoaoga, i le ofoina atu e le papuipui o le puipuiga mai le pitonuu lē saogalemu o loo siomia ai le aoga.

I se taumafaiga e fesoasoani i tagata taitoatasi ma aiga ia faateleina lo latou ola tutoatasi, sa tuuina atu ai e le Ekalesia i ni nai aiga ni masini autu e amata pe fausia ai a latou lava pisinisi. E le gata i lea, o fale o tamaitai ma tamaiti na tuuina atu i ai komepiuta, sapalai o umukuka (e pei o se ogaumu e tao ai pizza, laulau ai, se tanoa fufuluipu, ma ni fata), ma isi masini e fesoasoani ai ia i latou e aoao tomai, fatuina ni galuega, ma maua ai le ola tutoatasi.

Ma le mea mulimuli, na tuuina atu e le Ekalesia se toomaga mo faalavelave faafuasei i nuu i le eria atoa. Ina ua mavae le Afa o Fiona, e 65,000 aiga i Guadeloupe, Puerto Rico, ma le Ripapelika Tominika na tuuina atu i ai ni tupe e toefai ai o latou fale ma nuu. Sa galulue faatasi foi le Ekalesia ma le Ofisa o le Tamaitai Sili o Peru e tuuina atu i tagatanuu o Jaén, Peru, le silia ma le iva tone o meaai ma vai ina ua mavae timuga mamafa na afua ai ni lologa ma le tetele o elele solo i le nuu.

Ina ua faamalosia e lologa ia tagata e 140 e sosola ese mai o latou fale i le Itumalo o Panzós i Kuatemala, o na aiga e 46 na aafia—lea na aofia ai tamaiti, talavou, ma matuatausi—na mauaina ni lavalava na matua manaomia tele. Ma e ala i le foai a le Ekalesia i le Polokalama o Meaai a le Lalolagi i le 2022, sa mafai ai ona tatou faatupeina le tele o galuega faatino na fuafua mo le faaleleia atili o le gafatia i le Atu Karipeane, e aofia ai le faaleleia o filifili o sapalai ma galuega faatino o fetuunaiga o le tau—e pei o se faama’ite e faaleleia atili le muai iloiloina o gafatia i Haiti ina ia sili atu ona saunia tagata iina mo ni mea ogaoga e tutupu i timuga ma afā.





**Atapue i le pito i luga:** O tagata i le lotoifale i le Atu Keripeane e lagolago e le tasi le isi i le mavae ai o le aafiaga i le Afa o Fiona.

### SUIA O OLAGA MO LE LELEI

Sa fanau mai Feleti ma se tulaga na i ai le āva i lona gutu, lea na faigata ai ona faasusu o ia. Sa galulue malosi ona matua e tausisia lona soifua maloloina i se susu pauta, e ui ina sa tuuina atu ai se avega mamafa tautupe i lo latou aiga.

E ala i le faatupeina mai Le Ekalesia a Iesu Keriso o le Au Paia o Aso e Gata Ai, sa mafai ai e le Operation Smile ona faatautaia se polokalama i le atunuu o Feleti o Pasila e faailoa ai, togafitia, ma tuuina atu ni taotoga mo tagata taitoatasi e pei o Feleti o e semanu e le mafai ona maua le togafitiga sa latou manaomia.

Faafetai i nei taumafaiga, na mafai ai e Feleti ma le faitau selau o isi e pei o ia ona maua se taotoga manaomia, e fesoasoani ai ia i latou ia tuputupu ae ma atiina ae i ni fanau ma tagata matutua maloloina.



# Atiina A'e o le Ola Tutoatasi

“O le saunia faaletino ma le ola tutoatasi o lona uiga ‘o le talitonu e ala i le alofa tunoa, po o le mana gafatia, o Iesu Keriso ma lo tatou lava taumafaiga, e mafai ona tatou maua mea uma e manaomia faaleagaga ma faaletino o le olaga tatou te mananao ai mo i tatou lava ma o tatou aiga.’”

—EPIKOPO W. CHRISTOPHER WADDELL, FESOASOANI MUAMUA I LE AU EPIKOPO PULEFAAMALUMALU<sup>18</sup>





## Tausimea Faalesiosiomaga

- ua pau i le 38 miliona kalone i le faaaogaina faaletausaga o le vai talu mai le 2018 i le laumua o le Ekalesia
- 500+ falelotu o loo i ai i le taimi nei malosiaga e maua mai le la faama'ite i le lalolagi atoa
- 73 miliona tone o oloa toe faaoga na gaosia e Faleoloa o le Tesareta i le 2022

**I SE KONAFESI I LE 2022** i sini o le atinaega faalenatura a Malo Afaatasi, na saunoa ai Epikopo L. Todd Budge, “Afa tatou te galulue o ni tausimea lelei [o le lalolagi], e tele punaoa mo manaoga o o tatou uso ma tuafafine i le salafa o le lalolagi.”<sup>19</sup>

E talitonu tagata o le Ekalesia o le tausiga lelei o le lalolagi e fesooteai lelei lava i le tausiga mo i latou e manaomia le fesoasoani. O galuega faatino o fesoasoaniga alofa a le Ekalesia ua filifilia ma le faaeteete ina ia mautinoa ai o loo faatinoina vaifofo e mafai ona lagolagoina, e faaoga ai anomea i le lotoifale pe a mafai ai. E auai tagata o le Ekalesia i le faitau selau o galuega faatino o le siosiomaga i tausaga taitasi, e totona laau ma faatulaga le faamamaina i o latou nuu i le lotoifale. Tatou te talitonu o nei taumafaiga e fesoasoani e faasao ai le lalolagi, tausiga ai tupulaga i le lumanai, ma faigaofie ai ona maua punaoa o le lalolagi e i latou e manaomia le fesoasoani.

I lana saunoaga i le konafesi aoao ia Oketopa 2022, na saunoa ai Epikopo Gérald Caussé, “I le avea ai ma fanau a le Atua, ua tatou maua le poloaiga ia avea ma tausimea, tagata tausi soifua, ma leoleo o Ana foafoaga paia. Na fetalai le Alii na Ia faia ‘tagata taitoatasi ia tali atu, o se tausimea i luga o faamanuiaga faaletino, ua Ou faia ma saunia mo a’u meaola.”<sup>20</sup>

Sa galue le Ekalesia i le aluga o tausaga e faaitiitia le aafiaga faalesiosiomaga o ana meatotino ma aseta tetele. O lenei galuega ua aofia ai le faafouina o faiga o loo

i ai i le tele o vaifofo talafeagai, faaitiitia le tetelē o le laufanua, ma le faaaogaina o faiga gafatia e fau ai fale. Tatou te taumafai e tuu i totonu anomea o laufanua i le lotoifale ma mea faufale e faaitiitia ai tau o fela’uaiga, lagolagoina o tamaoiga i le lotoifale, ma tuuitiitia ai kasa leaga. Ua tatou tuuitiitia foi ia kasa leaga e ala i tulaga faatonuina maualuluga atu o le lelei o le suauu i a tatou faaputuga taavale i le lalolagi atoa.

Ua faalauiloa atili e le Ekalesia le tausimea faalesiosiomaga e ala i faiga lelei o le puleaina o fanua i ana faatoaga, togalaau suamalie, ma lafu manu. O nei faiga e aofia ai le faaaogaina o laau toto mo le puipuiga ma le faa’oaina o le eleele, faataamiloga o laau toto, leai ni faatoaga soona ’eli, puleaina o le faatataaina o manupapalagi, ma metotia e pue ai le kesi o falelaau faamili. O taiala o le puleaina o le eleele e fesoasoani e faateleina le faasologa o le karapona ma faaoga anomea o loo i ai i le tele e mafai ai.

I tulaga o le faaitiitia o le otaota, ua tatou faamoemoe e faaitiitia le faaaogaina o palasitika e tasi le faaogaaga ae faateleina aofaiga o anomea e toe faaaogaina i fale ma fanua o le Ekalesia. I le 2022, na toe faaoga ai e fale ma fanua o le Ekalesia le silia ma le 4,000 tone o pepa, uamea, pepa malo, ma palasitika (e le aofia ai tone e 73 miliona na toe faaaogaina e ala i Faleoloa o le Tesareta).

Ma le mea mulimuli, tatou te fautuaina o tatou tagata ina ia mulimuli i le fautuaga a Peresitene Nelson ia “tausiga le lalolagi, ia avea ma tausimea atamamai, faasaoina mo tupulaga i le lumanai, ma ia alolofa ma tausi e le tasi le isi.”<sup>21</sup> E auai tagata o le ekalesia i le tausimea faalesiosiomaga i ni auala eseese, e aofia ai le faasaoina o le malosiaga, toe faaaogaina, faaitiitia o le otaota, filifilia o metotia o femalagaaga faitele po o faaoga nei (e pei o le savavali ma le tietie uila), totona o meaai i le fale ma togalaau i le lotoifale, ma le faasaoina o le vai, aemaise lava i eria ua aafia i lamala.



## Polokalama o Aoga

- 342 potuaoga na fausia pe lipeaina
- E silia ma le 2 miliona tamaiti aoga na tautuaina
- 42,227 tagata e mauaina fesoasoani tautupe

**MATOU TE TALITONU** o le aoaoina o se sailiga i le olaga-atoa—o se mea e aumaia faalatalata atili ai i tatou i le Atua ma siitia ai le mamalu ma le ola tutoatasi.

### Auaunaga mo Tagata o le Ekalesia

E ala i polokalama fesoasoani tautupe e pei o le Tupe Faaagaga mo Aoga, e 5,757 tagata o le Ekalesia i atunuu e 52 na mafai ona lesitala i polokalama faaleaoaoga faalematata lea o le a fesoasoani ia i latou ia maua ai ni galuega lelei atu pe amata ai a latou lava pisinisi i le aluga o le lua tausaga. Ma e ala atu i le polokalama o le Sikolasipi a le Benson, e 443 tamaiti aoga i atunuu e 23 na maua le fesoasoani i le mauaina o a’oga pe a uma le a’oga maualuga, i matata tau faifaatoaga.

E faagaoioia foi e le Ekalesia le BYU–Pathway Worldwide, lea e galulue soosoo tauau ma le Brigham Young University–Idaho ma le Ensign College ina ia maua ai se avanoa sili atu i aoaoga taugofie i luga o le upega tafailagi. E le gata i lea, o loo maua le polokalama o le EnglishConnect i nai atunuu ma itulagi i le lalolagi atoa. E tuuina atu ai aoaoga faaPeretania e le totogia, e fesoasoani ai i tagata taitoatasi ia faaleleia atili o latou avanoa faaleaoaoga ma galuega.

### Auaunaga e Masani ona Ofoina Atu

Ua faia e le Ekalesia le faitau selau o galuega fesoasoani alofa i tausaga taitasi e faateleina ai le mauaina o aoaoga mo i latou e manaomia le fesoasoani. Mo se faataitaiga, i le itulagi o Nizhny Novogorod o Rusia, o se galuega faatino faatasi ai ma le Koluse Mumu i le lotoifale na tuuina atu ai ato faafafa ma sapaalai

meaoga mo tamaiti aoga e 200 mai tagata e vaivai faaleagafesootai, e faapea foi polokalama e fesoasoani ai i aiga e saunia ai mo le tausaga aoga fou.

I Lapanona, sa galulue ai le Ekalesia ma Jusoor e faatu ni vasega sauniuni mo le suega Brevet—o se suega e tatau ona pasia e tamaiti aoga e lesitala ai i aoga a le malo e faagaoioia e le setete. O lenei galuega faatino na fesoasoani i tamaiti aoga Suria ua faaunuua e faatoilalo papupuni i le faaauuina o aoga ma faaleleia atili ai faatinoga o tamaiti aoga averesi i le suega.

### IA MAFAI AI ONA MANUIA LE TAMAITIITI AOGA

O Edna, o se teineitiiti aoga mai Zimbabwe, na lesitala i le BYU–Pathway i le faaiuga o le 2021. Sa ia galue malosi i lana semesa muamua ma maua ai ni togi lelei. Ae sa ia le mautinoa pe o le a faapefea ona ia totogia le isi semesa e sosoo ai.

O le mea e lelei ai, sa mafai e Edna ona talosaga mo le sikolasipi a Heber J. Grant—o se polokalama fou na faatinoina i le 2022 lea e mafai ai e tamaiti aoga e manaomia ona maua fesoasoani tautupe mo a latou aoaoga i le BYUPathway.

O lenei fesoasoani na mafai ai e Edna ona faaauu le faapaleniina o lana galuega ma tautinoga faaleaiga a o agai atu i luma i lana sini o le avea ma se tausitusi faamaonia. Fai mai Edna, “O le na o le lesitala i le BYU–Pathway, ua mafai ai ona ou vaai i le tele o mea maoae ou te lei manatu o le a tutupu.”<sup>22</sup>



## Gaosiga ma le Faasoasoina o Taumafa

- 57.3 miliona pauna o meaai na foai atu
- Na lava meaai na gaosia e fafaga ai pe tusa o le 14.3 miliona tagata mo le aso e 1

**O TAGATA O LE EKALESIA** a Iesu Keriso o Au Paia o Aso e Gata Ai e ola i mataupu faavae o le ola tutoatasi, ma e tatou te saili e fesoasoani i isi ia faia foi faapea. Peitai, mo le toatele o loo tauivi ma le fiaai ma isi manaoga faanatinati faaletino, e faigata ona taulai atu i le ola tutoatasi mo se taimi umi pe afai e le o taulimaina ni manaoga mo se taimi puupuu. E saili le Ekalesia e fesoasoani i nei tagata e ala i ni vaifofo esese.

### Auaunaga mo Tagata o le Ekalesia

O loo faagaoioia e le Ekalesia faatoaga e 12, tolu togalaau, tolu lafumanu, ma togalaau suamalie e fa o se auala e maua ai meaai mo i latou e le tagolima, faapea foi le faagaoioia o fale e pei o le Fale Gaosi Falaoamata a le Tesareta ma masini fai Pasta. O nei fale ma fanua na tufatufaina atu le 48.3 miliona pauna o meaai i tagata o le Ekalesia ma isi sa manaomia le fesoasoani e ala i faleteuoloo a epikopo i le 2022.

E pei foi o isi taumafaiga a alalafaga, o loo faagaoioia e le Ekalesia faleteuoloo e 124 a epikopo, faapea foi isi nofoaga faaopoopo e mafai ai e taitai i le lotoifale ona faasino atu i tagata e manaomia ona maua ni meaai ma isi aitema e le tologia. E toetoe lava o faleteuoloo uma ma nofoaga autu e teu ai meaai i le fale e puleaina e faifeautalai mo auunaga. O nei volentia e okaina oloa, faavasega fataoloo, faatutumu oka, faamama fale, ma fesoasoani i tagata e o atu i ai i se auala agalelei ma le agaalofo. I nofoaga e aunoa ma le mauaina o oloa mai se faleteuoloo a epikopo, e masani ona faia e taitai ni fetuunaiga ma faleoloa i le lotoifale e taulima ai manaoga o tagata o le Ekalesia.

### Auaunaga e Masani ona Ofoina Atu

O le atiaeina o tomai ma punaoa mo le gaosiga o meaai e mafai ona teu, e fesoasoani i tagata taitoatasi ma le alalafaga ia faateleina le ola tutoatasi. O se auala e faamalosiaina ai nei tomai, sa galulue ai volentia a le Ekalesia ma le National Association for the Advancement of Colored People (NAACP) e faapipii se polokalama o le alavai-atamai i le Florence Fang Community Farm o San Francisco. O lenei galuega faatino o le a lagolagoina aiga e 100 i se eria e le tautuaina, ma o se tasi o le tele o polokalama o togalaau a le alalafaga na lagolagoina e le Ekalesia i le 2022.

E ese mai tufatufaga mai faleteuoloo a epikopo, e 57.3 miliona pauna o meaai sa foai mai e ala i faalapotopotoga o fesoasoaniga alofa, e aofia ai ma kapoti o meaai i le lotoifale. Mo se faataitaiga, na foai atu e le Ekalesia le toeitiiti 40,000 pauna o le fesoasoani o meaai i le polokalama fesoasoani o meaai e faatautaia e le Nofoaga Autu o Aganuu FaaKerisiano i le Aai o Niu Ioka. O lenei foai na fesoasoani e tuuina atu ai meaai ia i latou e le tagolima e ala atu i nofoaga e lua e fesoasoani ai i le pe tusa ma le 1,250 tagata i le vaiaso e maua ai mea e manaomia e pei o meaai fou ma aano o manufasi.

Ina ua mu i se afi le toeitiiti 50,000 pauna o oloa i le Maricopa Food Pantry i Arisona, sa o mai faatasi tagata o le Au Paia o Aso e Gata Ai i le lotoifale e vaai po o le a se mea e mafai ona fai. E lei leva, ae taunuu mai ni loli tetele se lua o oloa a le Ekalesia i le nofoaga e tufatufa ai meaai. E le gata i le ofoina atu o meaai i tagata i le lotoifale, a ua fuafua le Maricopa Food Pantry e toefausia ma se avanoa mo le aoaoina atu o le sauniuniga o meaai, teuina o meaai, ma vasega o le ola tutoatasi.

O nei taumafaiga ia gaosi ma teuina meaai e mafai ai e le Ekalesia ona faatumauina se faamaumauga fuafuaina o sapolai ia e mafai ona faalagolago i ai i le taimi

o se faalavelave. O le taunuuga, sa saunia le Ekalesia e fesoasoani atu pe a tulai mai mala faalenatura, taua, ma isi faalavelave faafuasei.

E galulue faatasi le Ekalesia ma faalapotopotoga fesoasoani i le lotoifale, e maua mai ma tufatufa atu oloa mo faalavelave faafuasei i auala sili ona lelei ma aoga e mafai ai. O nisi taimi o lona uiga o le tuuina atu o tupe e maua mai ai meaai i le lotoifale, ae o isi taimi, o lona uiga o le lafoina atu ma le tufatufaina atu o meaai lea e gaosia i Amerika i Matu. Mo se faataitaiga, ina ua uma

ona faatama'ia e le Afa o Ian le Atu Karipeane, sa auina atu e le Ekalesia ni koneteina la'u oloa se iva o araisa, pi, makaloni, ma isi meaai, ia sa tufatufaina e faalapotopotoga fesoasoani i le lotoifale.

E ala i nei saofaga, ua faamoemoe le Ekalesia e fesoasoani i tagata taitoatasi ma aiga ia ausia o latou manaoga mo se taimi puupuu ina ia mafai ai ona latou tulaia atu a latou taumafaiga i le fausiaina o le ola tutoatasi mo se taimi umi mo le lumanai.



### FOAI O MEAAI I LE AAI O KANSAS

O le Community Services League i Initipene, Misuri, e fesoasoani i nuu ia ausia o latou gafatia e ala i le tuuina atu vave o le toomaga i tagata e manaomia le fesoasoani ma vaifofo lea e taitai atu ai i le tulaga mautu o le tamaoaga. Ia Ianuari 2022, sa foai atu ai e le Ekalesia le silia ma le 100,000 pauna o meaai i le eria o le Aai o Kansas. O le uluai tiliva atu na alu i le Community Services League. I ni nai vaiaso

mulimuli ane, e 80,000 pauna o meaai na tuuina atu i le Harvesters Community Food Network and Redemptorist Social Services Center.

“Ua matou iloa a oo ina manaomia le fesoasoani e tagata Misuri pe osofaia foi i faalavelave, e mafai e o matou nuu ona faalagolago i tagata o Le Ekalesia a Iesu Keriso o le Au Paia o Aso e Gata Ai e tuuina mai se lima fesoasoani,” o le tala lea a le Kovana o Misuri o Michael Parson.<sup>23</sup>



## Tautua mo Aiga

- 195,491 itula o auunaga faufautua
- Auunaga na ofo atu i atunuu ma teritori e 90
- 346,664 tagata auai o le vaega o le toe faaleleia mai mea na fai ma vaisu

**O LE SOIFUA MALOLOINA FAALEMAFAUFU MA FAALELAGONA** ua avea ma se taulaiga taua mo tagata taitoatasi, aiga, ma nuu. O Tautua mo Aiga o se faalapotopotoga e lagolagoina e le Ekalesia lea e fesoasoani e tuuina atu le tausiga mataalia ma punaoa mo i latou e i ai manaoga faagafesootai ma faalelagona. Tatou te ofoina atu fautuaga i tagata taitoatasi o le Ekalesia, aiga, ulugalii, matua nofofua e maitaga, ma faifeautalai o loo auuna atu i le Ekalesia. O o latou manaoga atonu e mai se tofotofoga le tumau e oo atu i se luitau faifai pea faalemafaufau pe faalelagona.

O le polokalama o le toe faaleleia o olaga mai le tagofia o mea ua fai ma vaisu o se tasi lea o punaoa ua ofoina atu e ala i le faalapotopotoga a le Tautua mo Aiga a le Ekalesia. E tuuina atu e le polokalama le lagolago mo i latou o loo tauivi ma amioga le taupulea, faapea foi ma e pele ia i latou. O loo avanoa le polokalama maua fua mo tagata uma, pe o i latou o ni tagata o le Ekalesia pe leai. E taitaia i le lalolagi atoa e i latou e ofofua mai e faatautaia, o le toatele o i latou ua toe malolosi mai o latou lava luitau e faatatau i mea ua fai ma vaisu.

O le fesoasoani muamua faalemafaufau o se vaega taua o le tali atu i faalavelave faafuasei pe a fesoasoani i tagata o feagai ma se faalavelave, e pei o se faalavelave faalenatura po o se feteenaiga faaaupegaina. E galulue le Tautua mo Aiga e aoao atu ma ofo atu ni tomali fesoasoani muamua faalemafaufau i le salafa o le lalolagi e ala i le aufaigaluega ma volenitia ua aoaoina. I le 2022, sa lolomi ai e le vaega o le Tautua mo Aiga se tamaitusi

o punaoa e aoao ai tagata taitoatasi i le auala e auuna atu ai i tagata matutua, aualavou, ma tamaiti i le taimi o se faalavelave.

O nei punaoa ua faapitoa le aoga ia i latou o e ua aveese faamalosi mai o latou aiga. E faaoga e volenitia ma faifeautalai o auunaga a latou aoaoga faamasani i fesoasoaniga muamua faalemafaufau e tuuina atu ai le lagolago faalelagona i nei tagata taitoatasi o loo manaomia le fesoasoani—le lagolago lea e mafai ona taua e pei lava foi o le ofoina atu o fesoasoani faaletino.

### FAUSIAINA O TUFUGA

I le 2022, na tuuina atu ai e le Tautua mo Aiga ni uluai aoaoga mo fesoasoaniga faalemafaufau i taitai, tagata o le ekalesia, faifeautalai, ma tagata e tuuina atu le soifua maloloina faalemafaufau e fesoasoani i galuega faatino o fesoasoaniga alofa i le lalolagi atoa. I le avea ai o se vaega o se galuega faatino faapena i Haiti, na maua ai e Marceus ma Emanuelu ni aoaoga faalemasina ma ni fonotaga lagolago mo tagata e tuuina atu le soifua maloloina faalemafaufau.

E faatatau i na fonotaga, na tusia e Marceus, “Ua matua faamalieina lava au i le aoaoga. E fesoasoani tele ia te au, ma e fesoasoani i lo’u toalua ma la’u fanau ia maua se agaga toafimalie pe a luluina le lalolagi.”

Na tusia e Emanuelu, “Ua faamamaluina a’u ma fiafia e ... tuu atu i nisi tagata le avanoa e iloa ai nei mea, aemaise lava i lo’u atunuu o loo ou nofo ai. E toetoe lava o tagata uma o loo lagonaina pea lagona ootia ma manaomia le tele o fesoasoaniga faalemafaufau.”



## Kosi mo le Ola Tutoatasi

- E 14,186 vaega o le ola tutoatasi
- 106,261 tagata auai
- Ofoina atu i atunuu ma teritori e 88

**E FESOASOANI KOSI O LE OLA TUTOATASI** E aoao e tagata o le Ekalesia ia mataupu faavae ma tomai o le a faamamanaina ai i latou i le tausiga o latou lava manaoga. O kosi e aofia ai autu e pei o le auala e saili ai se galuega, auala e amata ai se pisinisi, auala e pulea ai mea tautupe, auala e fausia ai le maufetuuna'i faalelagona, ma isi mea. O nei vasega e aofia ai galuega atofaina mo faitauga faalevaiaso, talanoaga, ma le siaki atu i isi tagata o le vaega.

I le 2022, na faafoeina ai e le Ekalesia ni vaega e 14,186 o le ola tutoatasi i atunuu e 88 i le lalolagi atoa. O nei vaega na auauna atu i le silia ma le 106,261 tagata, o se tasi o i latou o Jacquie. O Jacquie o se faiaoga e faatautaia se pisinisi pueata i Kalefonia. Sa ia lagonaina le tele o le popole ma le atuatuva'e a o ia taulimaina ni galuega se tolu, se pisinisi, ma se aiga. Na iloa e Jacquie sa ia manao ia lelei atili i le puleaina o ona lagona, o lea sa amata ai ona ia auai i se kosi o le maufetuunai faalelagona. Ina ua maea le kosi, sa faasoa mai e Jacquie sa ia maua se faamoemoega fou faatasi ai ma le fesoasoani a isi tagata auai, ma sa ia lagonaina ua sili atu lona saunia e fetaiai ma luitau o le olaga.

Sa feagai Sitivi ma luitau faapena ina ua leai sana galuega a o ia tauivi ai ma se vaisu o fualaau faasaina. Sa le mafai ona faigaluega o ia, lea na toe faaletonu ai o ia ma lona aiga i mea tautupe. O le taimi lava na ia toe ulufale atu ai i le vaega faigaluega, sa tonu loa ia Sitivi

ma lona faletua e auai i le kosi patino o mea tautupe. O mausa na la aoaoina i le kosi na fesoasoani ia Sitivi ma lona faletua e ausia ai le la sini o le saoloto mai aitalafu. Sa mafai foi ona lava tupe sa la sefeina e faatau ai se fale fou ma ausia ai le tulaga mautu tautupe sa latou manaomia e tausi ai lo latou aiga.

### FAUSIAINA O TOMAI E TAULIMA AI LUITAU O LE OLAGA

I Suitiselani, sa faafoeina ai e Keli ma lona faletua o Maria se aoaoga o le maufetuuna'i faalelagona mo ni nai tagata o le latou aulotu i le lotoifale. E ui ina sa musu muamua e auai, ae sa fesoasoani le kosi ia Keli ma Maria e aoao e uiga i luitau faalelagona.

Sa faamaonia le aoga o lenei mea a o la galulue e fesoasoani i lo la atalii, o lē sa tauivi ma faaletonu faalelagona, o le faaletonu o le le mataofiofia (ADHD) ma le atuatuva'e. Ae na oo i le taimi ua tatau ona fai i ai se togafiti ae le'i leva ae pagatia Keli i le uluai osofaiga o ia i le atuatuva'e

"Sa mafai ona ou toe foi i nisi o mataupu faavae sa matou talanoaina, e pei o le taulimaina o lau manava," o le tala lea a Keli. O le pipiimau i le taula o le Faola ma mataupu faavae o le maufetuuna'i faalelagona, e mafai ai e se tagata ona faia vavega."



## Auaunaga mo Galuega ma Faleoloa o le Tesareta

- 4,127 tulaga o galuega ua faamaumauina
- 9,186 paaga a le Faleoloa o le Tesareta sa tautuaina
- E 77,330 aitema o meaafale na gaosia

**MATOU TE TALITONU O LE FESOASOANI** i tagata ia sili atu ona ola tutoatasi e faateleina ai lo latou gafatia e faia filifiliga mo i latou lava. O Auaunaga mo Galuega e tuuina atu ai meafaigaluega ma aoaoga e fesoasoani ai i tagata o le Ekalesia e saili ni galuega, amata pisinisi, ma alualu i luma i a latou matata.

I le 2022, e faitau afe le au saili galuega na mauaina punaoa mo fesoasoaniga faaletagata lava ia ma auai faatasi ma i tatou i vaega na taulai atu i le faateleina o tomai ma upegafesootai o sailiga galuega. E ala i Auaunaga mo Galuega, sa latou aoaoina ai tomai e pei o auala e fatu ai se faamatalaga o tomai, faatalanoaga mo se galuega, ma saili mo se galuega. Mo se faataitaiga, o le polokalama o le Active Job Search o loo avea o se meafaigaluega o le upegafesootai mo i latou o loo sailia ni galuega fou pe sili atu. O i latou o loo i le polokalama e feaasoai i avanoa e tau atu i galuega, e maua le lagolago, ma faataitai tomai o sailiga galuega.

Ua fesoasoani Faleoloa o le Tesareta (DI) i tagata o le Ekalesia ma isi e faatoilalo papupuni i galuega. O nei papupuni e ono aofia ai manaoga faapitua faaletino, tauiviga o le soifua maloloina faalemafauau, faamaumauga faasolitulafono, po o se talafaasolopito o vaisu. Ua saunia e le DI ma le Deseret Manufacturing se avanoa saogalemu e aoao ai ni tomai fou e ala i aoaoga faamasani i galuega, e faatagaina ai paaga e aoao mea uma mai le faagaioiga o le lesitala ma le faaaliga o suegaoloa e oo atu i le faagaioiga o le fokilifi, ma le gaosiga o meaafale.

E faaopoopo atu i le aoaoina o tomai, o paaga e lagolagoina e faufautua o le atinaega, o e fesoasoani ia i latou e faatutu ni sini ma atiina ae se fuafuaga e ausia ai na sini. E tuuina atu foi e le DI fesoasoani tautupe mo aoga ma aoaoga faamasani. O paaga a le DI o e ua saunia e saili mo se galuega fou e mafai ona maua isi vaega o le lagolagosua mo galuega, e aofia ai se mafutaga faaleaoga mo le sailia o galuega mo le ono vaiaso ma le aoaoina patino o le tagata lava ia.

E lagolagoina e le DI le alalafaga e ala i le tuuina atu o mea e manaomia i se tau taugofie. E mafai foi e tagata o le Ekalesia e le tagolima ona maua ni aitema e manaomia e pei o seevae, lavalava, meaafale, ma isi mea taua e aunoa ma se tau, faatasi ai ma se tusi mai lo latou epikopo. E saofaga foi le DI i nuu i le lotoifale e ala i foai e faatagaina ai vaega e le saili tupe ua faamaonia, e maua fua ni oloa mo le faaogaina i o latou eria. Na faatautaia e le DI le 12,954 o nei foai i le 2022

O le ata faataitai o le faleoloa taugofie o le DI ma foai a le alalafaga ua mafai ai ona tatou taofia le faitau miliona o pauna o oloa mai nofoaga e lafoai ai mea

---

*“Ae tatou te lei alolofa moni i le Atua ma o tatou tuaoi, e tatau ona tatou muai lagonaina le alofa o le Atua mo i tatou o Ana fanau. Pe a tatou lagonaina le alofa o le Atua mo i tatou, tatou te mananao e toe alolofa ia te Ia.”*

—SISTER KRISTIN M. YEE

Fesoasoani Lua i le Au Peresitene Aoao o le Aualofa<sup>24</sup>

---



i tausaga taitasi. O aitema e le mafai ona faatau atu e toe faaaoga, ma i le 2022 lava ia, na mafai ai e le DI ona toe faaaoga le 73,019,376 pauna o aitema na foai mai nai lo le auina atu o na mea i le nofoaga e lafoai ai.

E ala atu i ona faleoloa taugofie, fale gaosi oloa, ma nofoaga autu o foai, o le DI—i lona ute—o se polokalama e aoao faamasani ai i galuega ua fausia e faamalosia ai

tagata ma faateleina ai o latou avanoa. O loo faagaoioia i le taimi nei e le Ekalesia ni faleoloa taugofie e 46 o le DI ma nofoaga autu mo foai i setete e valu. I le 2022, o le faleoloa aupito fou o le DI—o loo tu i Saratoga Springs, Iuta—sa faapaiaina ma tatalaina mo le faagaoioia.



### SAILIA O GALUEGA E ALA I A’OA’OGA

Ina ua iloa e Dustin ua le toe faigaluega i le mavae o ni nai tausaga i lana kamupani, sa ia le mautinoa po o fea e amata ai lana sailiga mo se galuega fou. Sa fautuaina o ia e lona tuafafine e auai atu i se vaega o tagata saili galuega, ma faamamafa atu le aoga o le polokalama mo i latou o e na faia le taumafaiga.

Sa maua e Dustin se vaega i lana eria ma amata ona aoao ni auala e mafai ai ona lelei atu lona

maketiina o ia lava o se sui auai. I le taimi o fonotaga faalevaiaso ma faiaoga, sa ia fatuina ai lana faamatalaga o tomai, saunia ma faataitai mo faatalanoaga, ma faaalu le taimi i upegafesootai.

Ina ua mavae ni nai vaiaso, sa mafai e Dustin ona maua se galuega ina ua uma ona fesootai ma se tagata sa la faigaluega muamua. “Ana leai le a’oa’oga, ma ana ou le aapa atu lava, semanu ou te le mauaina le galuega,” o le tala lea a Dustin.<sup>25</sup>



## Soloaiga o Auaunaga

- e 7,464 tagata na fesoasoani i ai
- E silia ma le 31,870 itula o auaunaga ofo fua

### O NISI TAIMI E MANAOMIA AI E TAGATA LE

**LAGOLAGO** a o latou milo faatasi i lo latou alalafaga. E mafai ona aofia ai tagata ua o ese mai falepuipui, ua lagonaina le leai o se aiga, po o le toe faaleleia mai fefaatauaiga o fualaau faasaina, faapea ai foi ma tagata tomai matutua po o tagata taitoatasi o e faatoa fāi mai pe na sosola ese mai o latou atunuu. E tuuina atu e le Soloaiga o Auaunaga le lagolago i nei tagata—o tagata o le Ekalesia ma i latou i le alalafaga—a o latou amataina se itulau fou o o latou olaga.

E taulai atu Soloaiga o Auaunaga i se taumafaiga tuufaatasi i le ola tutoatasi, ma e galulue tagata faigaluega ma a latou tagata o loo faaogaina le auaunaga e talanoaina mataupu autu ma tuuina atu

le lagolago faalelagona. O le Soloaiga o Auaunaga e faagaioia nofoaga e fitu i le Iunaite Setete, e ofoina atu ai fesoasoaniga faaletino, mafaufau, ma faaleagaga. E maua e tagata e faaogaina le auaunaga le fesoasoani mai se vaega o tagata faigaluega o le Soloaiga o Auaunaga, faifeautalai mo auaunaga, ma volenitia—e aofia ai tagata o le Ekalesia i le lotoifale.

I le aluga o taimi, e mafai ona faasino atu tagata taitoatasi i faalapotopotoga lagolago faaopopo, e pei o Auaunaga mo Galuega po o Faleoloa o le Tesareta. E mafai foi ona faasino atu i latou i isi faalapotopotoga e le saili tupe, iunite o le soifua maloloina faalemafaufau, po o faalapotopotoga a nuu e fesoasoani ia i latou i la latou malaga umi i le ola tutoatasi.

O i latou o e ua mauaina le fesoasoani e tuuina atu foi i ai le avanoa e auauna atu ai i isi, lea e faateleina ai lo latou lagona o le soifua manuia a o latou vaaia le taua latou te faaopopo atu i olaga o isi.

### MAUAINA O LE FESOASOANI E TOE AMATA AI

I le mavae ai o le tele o tausaga o tauiviga ma le maua o le malosi o le ma'i o le mafaufau ma le faifai pea o le le mautonu i le le i ai o se aiga, sa tonu ai ia Kitty\* e amata se olaga fou i luta, ma faia ai le malaga umi e ala i le savali. O le taimi lava na taunuu ai o ia, o uo sa aafia foi i le leai o ni aiga sa fesoasoani ia te ia e sue ai lona ala i le ofisa o le Soloaiga o Auaunaga.

Sa tuuina atu e le aufaigaluega i le ofisa o le Soloaiga o Auaunaga i lona lotoifale ia meaai, lavalava, ma isi mea e manaomia, ae sa latou iloaina o le mea na sili ona manaomia e Kitty o le faauo ma le alofa. Sa latou fesoasoani ia te ia e

volenitia lona taimi i Faleoloa o le Tesareta lea na amata ai ona ia maua ni uo. Na faasolosolo lemu lava, ona mou atu ona lagona o le ita ma le tuulafoaiina.

Ina ua mavae sina taimi, sa tonu ia Kitty ua lava lona toafimalie e taumafai ai e maua se galuega. O lona ofisa o le Soloaiga o Auaunaga na faafesootaia o ia i le Auaunaga mo Galuega, lea na ia maua ai le fesoasoani i le tuufaatasia o lona faamatalaga o tomai [resume]. O lenei fesoasoaniga na fesoasoani ia te ia e tuputupu ae ai i le tutoatasi ma le faalagolago ia te ia lava.

*\*Ua suia le igoa*

# O Le A se Mea e Mafai Ona Ou Faia?

“A tatou punouai i auaunaga i isi, tatou te le manatu tele la ia i tatou lava, ma mafai ai ona saunia atili le Agaga Paia e afio mai ia i tatou ma fesoasoani mai ia i tatou i la tatou sailiga o le olaga atoa ia maua le meaalofa o le alofa mama e faaee mai i o tatou luga.”

—PERESITENE HENRY B. EYRING, FESOASOANI LUA I LE AU PERESITENE SILI<sup>26</sup>





## Auauna atu i Lou Nuu

**AFAI UA MUSUIA OE E AUAUNA ATU**, o laasaga nei e mafai ona fesoasoani ia te oe e faia ai se aafiaga silisili mo le lelei.

### 1. Faailoa se Manaoga

O le auala sili e amata ai o le tilotilo solo lea i ou autafa ma faailoa mai manaoga o loo i ai i lou nuu.

- Faamuamua manaoga silisili i totonu o le tele o ou tosinaga.
- Vaavaai mo ma aoao e uiga i faalapotopotoga ma galuega faatino i le lotoifale.
- E ui o le auauna atu e faapupula atu ai i taimi uma le alofa o le Atua mo isi, ae e le tatau ona faia ma le faamoemoe e tulei ai talitonuga patino i isi. Tuu atu i au galuega lelei e tautala.



---

*“E tele taimi, o mea tatou te faia e le vaaia pe iloa e isi. Peitai, e silafia e le Atua, ma Na te faamanuiaina i tatou pe a tatou auauna atu i ni auala filemu, ma lē mavaaia.”*

—PERESITENE SUSAN H. PORTER  
Peresitene Aoao o le Peraimerj<sup>27</sup>

---

## 2. Faalogo ma Aoao

Faaalu sina taimi e faalogo ai i tagata e sili ona aafia i le faafitauli. O le faalogo ma saili ia malamalama i papupuni o loo feagai ma i latou o loo siomia ai i tatou e aoaina ai i tatou i le auala e tuuina atu ai se fesoasoani anoa.

- Ia auai ma tagata taitoatasi o se paaga ma ia tutusa. Tilotilo i mata o le tagata, valaau i latou i o latou igoa, ofo atu lau fesoasoani.
- Fesiligia ou lava manatu, tuu ese le faailoga tagata, ma saili ia malamalama moni.
- Faamuamua sootaga i lo soo se eseese i manatu.

## 3. Fai se Fuafuaga

O le fesoasoani sili ona mataalia o fesoasoaniga alofa e aofia ai tagata taitoatasi ma nuu a o e fuafuaina vaifofo e fetau ma manaoga vave ma saunia se ala e fausia ai le ola tutoatasi.

- Faaaloalo i mea e fiafia i ai, talitonuga, ma agaifanua a i latou e te saili e fesoasoani i ai.
- Valaaulia i latou o loo e auauna atu i ai e fesoasoani e atiina ae se fuafuaga e ala i le faia o fesili e pei o nei:

*O le a se mea ua uma ona e taumafaia e talanoaina ai lenei manaoga?*

*O le a se mea e te manao e faataitai?*

*E faapefea, o afea, ma o fea e te manao e maua ai le fesoasoani?*

## 4. Faasoia Atu Ou Aafiaga

Tatou te faasoia atu o tatou aafiaga e valaaulia ma musuia ai isi e faatino. O le faaogaina o avanoa e iloa ai, faasoia, ma faamanatu ai faatinoga faamanuiaina o auaunaga e uunaia ai i latou e te fesoasoani i ai ma musuia ai isi tagata taitoatasi e auauna atu.

- Talanoa i uo ma aiga e uiga i lau galuega fesoasoani alofa. Valaaulia i latou e auai faatasi ma oe.
- I luga o au itulau o ala o faasalalauga faaagafesootai, faasoia atu tala e uiga i faamanuiaga o auaunaga ua e vaaia—i lou olaga ma olaga o i latou na e auauna atu i ai.
- Fesootai ma itulau o ala o faasalalauga faaleagafesootai o faalapotopotoga e le maua ai ni polofiti sa outou galulue faatasi i lou nuu. Faasoia atu ou aafiaga lelei ia i latou.



## Punaoa e Aoao Atili Ai

Ina ia maua nisi faamatalaga e uiga i a tatou galuega fesoasoani alofa i le lalolagi atoa ma auauna ai i lou nuu, mulimuli mai ia i matou i le:



@Caring.ChurchofJesusChrist  
@DeseretIndustriesThrift  
@JustServe.org



@Caring.ChurchofJesusChrist  
@DeseretIndustries  
@Just\_Serve



Faaaoga le numera faailo i le itu agavale e sii mai ai le polokalama JustServe ma amata ai i se galuega faatino o auaunaga i le lotoifale i lo outou eria.

## Ina ia aoao atili, mulimuli mai ia i matou i le:

ChurchofJesusChrist.org | Caring.ChurchofJesusChrist.org | JustServe.org | DeseretIndustries.org | AddictionRecovery.ChurchofJesusChrist.org

# Punaoa Faasino

1. Russell M. Nelson, "O Mea o Loo Tatou A'oa'oina ma O Le a Lē Galo Lava," *Liahona*, Me 2021, 79.
2. Kym Reichart, in "Places of Refuge from the Storm," news-uk .churchofjesuschrist.org/article/places-of-refuge-from-the-storm.
3. Todd Budge, "Tuuina Atu o le Paia i le Alii," *Liahona*, Nov. 2021, 101.
4. Christina Foote, i le "Au Paia o Aso e Gata Ai i Europa e Maua Faamanuiaga e ala i le Faamanuiaina o Isi," news-uk .churchofjesuschrist.org/article/latter-day-saints-in-europe-receive-blessings-through-blessing-others.
5. Russell M. Nelson, "O Le Taimi Lenei," *Liahona*, Me 2022, 126.
6. Julia Wondra, i le "How the Church, its Leaders and Members in Europe Are Providing Aid and Relief in the Humanitarian Crisis Caused by Armed Conflict," thechurchnews.com/2022/3/6/23216823/how-the-church-its-leaders-members-in-europe-are-providing-aid-and-relief.
7. Sylwia Selewska, i le "As Conflict in Europe Enters a Fourth Month, the Saints Continue to Serve Refugees," newsroom .churchofjesuschrist.org/article/poland-ukraine-refugees-four-months.
8. Hana Debebe Hailu, i le "The Fruits of Service: Latter-day Saint Youth in Ethiopia Plant 200 Fruit Trees," thechurchnews.com/global/2022/10/5/23386120/ethiopia-youth-plant-200-fruit-trees.
9. Dallin H. Oaks, "Fesoasoani i e Matitiva ma Mafatia," *Liahona*, Nov. 2022, 7.
10. Gérald Caussé, "The Blessings Will Follow: Benefits of Implementing JustServe," churchofjesuschrist.org/study/video/justserve-videos/2020-10-0100-the-blessings-will-follow-benefits-of-implementing-just-serve-1080p?lang=eng.
11. Patti Evershed Peterson, i le "How Service Became the Silver Lining in a Terminal Cancer Trial," thechurchnews.com/2022/1/30/23218832/cancer-service-justserve-festival-of-trees-patti-peterson.
12. Len Gierach, i le "Latter-day Saints Join World Interfaith Harmony Week Celebrations," news-ca.churchofjesuschrist.org/article/latter-day-saints-join-world-interfaith-harmony-week-celebrations.
13. Dohad Mohamad Alsholbi, i le "How Bees and Goats Are Changing Lives in Jordan," news-middleeast.churchofjesuschrist.org/article/how-bees-and-goats-are-changing-lives-in-jordan.
14. Rachel Steinberg, i le "Light the World Giving Machines in 2021 Yielded Nearly US\$6 Million in Donations," newsroom .churchofjesuschrist.org/article/giving-machines-2021.
15. Camille N. Johnson, i le "Church Gives \$32 milion to World Food Programme in Largest One-Time Donation to Date," thechurchnews.com/global/2022/9/14/23353487/church-gives-32-million-dollars-to-world-food-programme-largest-one-time-donation-to-date.
16. Ginette Bott, i le "Silicon Slopes Packages 1 Million Meals for Utah Food Bank," newsroom.churchofjesuschrist.org/article/million-meals.
17. Oscar Ayala, i le "La Iglesia de Jesucristo dona equipo medico a clínica del ojo en Jutiapa, Honduras," noticias.laiglesiadejesucristo.org/articulo/la-iglesia-de-jesucristo-dona-equipo-medico-a-clinica-del-ojo-en-jutiapa-honduras.
18. W. Christopher Waddell, "Sa I Ai le Areto," *Ensign* po o le *Liahona*, Nov. 2020, 44.
19. L. Todd Budge, "The Divine Gift of Creation: Our Sacred Duty to Care for the Earth," newsroom.churchofjesuschrist.org/article/bishop-l-todd-budge-sacred-duty-care-for-earth.
20. Gérald Caussé, "O La Tatou Tausiga Faalelalolagi," *Liahona*, Nov. 2022, 57.
21. Russell M. Nelson, "O Le Fofoaga," *Ensign*, Me 2000, 86; *Liahona*, Iulai 2000, 104.
22. Edna Mafuvuke, i le "By Small and Simple Things," blog.pathwaynewsroom.org/2022/03/edna-mafavuke/.
23. Michael Parson, i le "Food Donations for Local Charities Received by Missouri Governor," newsroom.churchofjesuschrist.org/article/food-donations-for-local-charities-received-by-missouri-governor.
24. Kristin M. Yee, i le "New Deseret Industries, Welfare, and Self-Reliance Services Facility Dedicated in Utah," newsroom .churchofjesuschrist.org/article/new-deseret-industries-welfare-self-services-facility-dedicated-in-utah.
25. Dustin Ray, i le "How Church Employment Services Helps People Find Jobs and a Connection to the Savior," thechurchnews.com/2022/2/25/23216701/church-employment-services-helps-unemployed-people-find-jobs-self-reliance-connection-to-savior.
26. Henry B. Eyring, "Auaunaga Musuia," *Ensign* po o le *Liahona*, Me 2018, 64.
27. Susan H. Porter, i le "Presidents Johnson and Porter Meet with Government Leaders on Women's Issues in South America," newsroom.churchofjesuschrist.org/article/presidents-johnson-and-porter-meet-with-government-leaders-on-womens-issues-in-south-america.
28. Russell M. Nelson, "O Poloaiga Sili Lona Lua," *Ensign* po o le *Liahona*, Nov. 2019, 97).

*“O i latou o loo naunau ina ia ta’ua o le nuu o le Alii ua “loto e tauave le avega a le tasi [ma le isi], ... e faanoanoa faatasi ma e e faanoanoa; ... ma [ia] faamafanafana atu ia te i latou o e e manaomia le faamafanafanaga.”*

—PERESITENE RUSSELL M. NELSON

Peresitene O Le Ekalesia a Iesu Keriso o le Au Paia o Aso e Gata Ai<sup>28</sup>

